

Jesucristota San Juantau Yeu Machiriakähui

Jesucristo áu yeu machiriak

¹ Jü Jesucristota áu yeu machiriakähui, ä néshui joame am jüneetuanakë béchïbo, Diosta ä mákakä pámani, juka läuti yeu huéenakemta. Huanäi ä jüneriatebok, ángeltamak Juantau ä bíttuak.

² Juan Diosta noki nooka, entok Jesucristota bétana huemta nooki, entok síme juka ä bíchakähui.

³ Diosta tü éeri jípure, jü Diosta noki nokame, entok jume ikäi Diosta profecía jíkkajame, jïojterita ëriame entok ä jiäpo áman jiápsame. Bueïtuk jü taahuari béja yúmaseka huéiye.

Juan jume Ásiapo guóy búsan Jesucristota sualhuäpo nau anim tebotua

⁴ Ínapo, Juan jume guóy búsan Jesucristota sualhuäpo nau anim joomemmehui. Diosta tühua entok yánti éehuame enchimmaki, jü ëni, entok chë bannaataka jiápsaïhui, entok äbo yebijnakeme, entok jume guóy búsan espíritum banko rey nésaupo kátekamta bíchäpo aneme,

⁵ entok Jesucristo, síme huitti ä bíchakäu lütüriateme. Áapo jü kësam-riapo kókkolam násuk jíabitekame, entok jume reyim béppa yäura úttiata jípureme ä iä pámani, jü itom

nákekame entok jume itom Dios bejrim ä ójboy báksiakame.

⁶ Huanäi reyim entok sacerdootempo itom yáuhuak, ä Dios Áchay béchïbo. Ä úttiilhuame áa béchïbotunake, entok jü buere úttiära ániapo ayukame, jíba huásu-huásuktiampo. Júnentunake.

⁷ ¡Én beja, namupo äbo huéiye! Entok síme pusim ä bínnake, entok jume ä takahua kúrusit kökosi ä yáakame junne. Entok síme jume pueblom ániat aneme jiokot jíakam ä buanrianake. Jeehui, júnentunake.

⁸ “Ínapone jü Alfa entok jü Omega, jü bat huéeme, entok jü ä chupëpo huéeme”, ínel jiaahua jü Señor, jü én aneme entok bannaataka aneïhui, entok jü yebijnakeme, jü síme úttiärata jípureme.

Jü Yoremta Üusi bít-huakahui

⁹ Ínapo Juan enchim hermaano entok jiokot anhuäpo enchim jáläekame, Diosta reytaka nésahuëpo entok Jesucristotat yanti boobít-huäpo. Isla Patmos ti téhuaakapone aaney, Diosta noki béchïbo, entok Jesucristota huatemmeu ín nokä béchïbo. ¹⁰ Ínapone Espíritu Santota úttiära hétuk aaney Señorita taahuaripo. Huanäine nok jáhuita ín ama hétana jikkajak, trompeetata jáhui bënaka, tüisi kusisi,

¹¹ ínel jíaka:

—Ínapone jü Alfa éntok jü Omeega, jü kësampo entok jü ä chupëpo huéeme. Libropë

ä jiojte, juka em bíchähui. Huanärë guóy búsan Cristota sualhuäpo nau animmeu ä bíttua, Ásiapo jomemmehui: Efeso pueblohui, Esmirna pueblohui, Pérgamo pueblohui, Tiatira pueblohui, Sardis pueblohui, Filadelfia pueblohui, entok Laodicea pueblohui.

¹² Kúaktekane, ä bít bábareka, juka inou nokamta. Huanäine guóy búsan kanteelam áma jájãbuahuame oropo yáarim bitchak.

¹³ Jume guóy búsan candelerom násuk éntok, huépülak Yoremta Ũusi bénakne bitchak, guókimmeu núkisi sánkokamta. Jenotahuit áman éntok cinto orota jípurey.

¹⁴ Ä kóbba entok ä choonim, tósalitukaimme, kabara bóata bénasi, entok sá pam bénasi. Ä pusim éntok, táijta béetë benaakay.

¹⁵ Ä guókim éntok, bronceta bélojkosi horno táijpo buásata benaakay; ä jáhui éntok, yún báam tüisi kusisi kón huéchëpo benak nok jáhuiakay.

¹⁶ Ä bátatana mámpo guóy búsan chókim jípurey. Ä tempo éntok, senu ejparam yeu huéiyey, náu bíchaa buahuiakay. Ä pujba éntok, täata benaakay, tüisi síme ä úttiäray ä machiriapo.

¹⁷ Ä bíchakane éntok mukukamta bénasine huétchek, ä guókpo. Áapo éntok ä báta mámam ino béppa óreka, ínel inou jiaahua:

—Katë májhue. Ínapone jü kësampo huéeme entok jü ä chúpëpo huéeme,

¹⁸ Jü jiápsame entok jü mukilatukaïhui. Bueítuk én éntok, jíba huásu-huásuktiapone jiápsa. Júnentunake. Entokne am jípure, jume kókkohua llaavem, entok jume infierno llaavem.

¹⁹ Akë ä jiojte, juka jita em bíchakähui, entok juka én ayukamta, entok juka chúkula ikäi chäka ayunakemta.

²⁰ Jü kaa át jüneehuäpo ín bátatana mámpo guoy búsan chókkim em bíchakähui, entok jume guóy búsan candelerom oropo yáarim: Jume guóy búsan chókkim, guoy búsan iglesiammehuim ángelesim; jume guoy búsan candelerom oropo yáarim éntok, jume em bíchakähui, guoy búsan iglesiamme.

2

Jü Diosta nooki Áasiau bíttuari guoy búsan Cristota sualhuäpo nau animmeu: Diosta nooki pueblo Efesou bíttuari

¹ 'Efeesopo Cristota sualhuäpo nau animmeu ángeltahuë jiojte: “Ä bátatana mámpo jü guoy búsan chókim jípureme, jü guoy búsan oro candelerom násuk naa hueramame, ikäi nooka:

² Ínapone ä täya, juka em juähui, entok juka bétte tékilta joaka yánti em emo nüyëhui. Jume kaa türik joame katë am bibit péiya. Éntoke am täya, jume apóstolpo emo naíkiamme kaa apóstolimtaka, bueítuk ára nókìchipë ä téula.

³ Jiokot ansulatake yánti jiápsa, éntoke át boobitchula, éntoke bétte tékilta joaka

tekipanuala, ín téhuam em emo náké béchibo, éntoke kaa kóm éiya.

⁴ Tëne senu huémta em jípurëu kaa emót türe, bueituk juka tua bat em nákeihuë tóij-la.

⁵ Áhuë huáate, jáksë jiöbeka kón huétchek. Éntoke emo jíapsi kuaktiaka, juka bat em jojuaihuë yáuhua. Bueituk kaa ä junëlituko, läutine emou yepsaka juka em candelerotane enchi ühuaka sékana órenake, bueituk kaa enchi emo jíapsi kuaktiako.

⁶ Bueituk íkäre jípure: juka kaa türik nicolaítam joähuë kaa bibit péiya, ín kaa türëu kétchi.

⁷ Jü nákakame ä jikkaijnake, juka Espíritu santota Cristota sualhuäpo nau animmeu ä nokähui. Juka yöokamtane, júya taka jíapsihuamta hueriamta ä buätuanake. İri júya éntok Diosta paraíso násuk huéiyek.”

Diosta nooki pueblo Esmirnau bíttuari

⁸ 'Esmirna iglesiapo ángeltahuë jiojte: “Jü bát huéeme éntok ä chúpëpo huéeme, jü mukukame entok jíabeitekame, íkái nooka:

⁹ Ínapone em yáari täya, entok jiojot em bíthuähui, entok em poobëra. Të empo rikoë. Entokne am täya, jume bettek emo bétana nokaka emo judíom tíame. Të kaa junëli, ál-lam Satanásta sinagoogam.

¹⁰ Katë májhue, juka jita emou huéenakepo. Ímïri jü diablo cárcelpo huatem jóatebonake, enchim jiöbila béchibo. Huanärem guoj mamni táapo jiojot annake. Em mukëpo tájtë huitti

éaka jíapsa. Huanäine ínapo enchi ä máknake, juka coronata jíba béchïbo jíapsihuamta.

¹¹ Jü nákakame ä jikkaijnake, juka Espíritu Santota Cristota sualhuäpo nau animmeu ä nokähui. Jü yöokamtahui, guosa huëpo kókkohuame kaa áu huéenake.”

Jü nooki pueblo Pérgamou bíttuari

¹² 'Pérgamo iglesiapo ángeltahuë jïojte: “Jü ejparam náu bíchaa buahuim entok buahui sibulay jípureme, íkai nooka:

¹³ Ínapone simeta em joäu täya, entok ják em anëhui diablota bankot kátekäpo, të jíbe ín téhuam émomak jípure. Éntoke inot éehuamta kaa omoutela, huámëchi taahuarimmet jü Antipas kaa au náyoteka ín testigo enchim násuk ä mëhuak junne, jum Satanásta jóakäpo.

¹⁴ Huatekne enchi béj-reka huémta jípure: bueitukim émomak áma aane, jume Balaamta majtiari kee tójame. Huäri Balacta majtiay, jáchin jume israelita usiarim am jioptuanakë béchïbo, juka ídolommeu bíchaa náikiata am buänakëhui, entok kaa emo jubeka náu totöhuamta.

¹⁵ Éntoke két áma am jípure, jume nicolaítam majtiarita kee tójame, juka kaa ín türëhui.

¹⁶ Huäri béchïbo, emoë jíapsi kuaktia; bueituk kaa ä junëlituko, läütëlane emou yebijnake. Huanäine ámemak náassuanake, ejparam ín tempo yeu huémmeyi.

¹⁷ Jü nákakame ä jikkaijnake, juka Espírituta jume igleesiammeu ä nokähui. Juka yölataka áma yeu sikamtane, juka maná éSORITA am

buätuanake, éntokne ket ili téta tósalik ä máknake. Jú ili tétat éntok, huépul téhuam bemela át jiojteri; júmëi kaabe täyanake, hua tétata mabetakame jíbba.”

Diosta nooki pueblo Tiatirau bíttuari

¹⁸ Tiatira iglesiapo ángeltahuë jiojte: “Jü Diosta Ūusi, jü táji béetemta bénasi pusekame, éntok bronze bélojkosi táijpo buásata benam guókekame, íkai nooka:

¹⁹ Ínapone ä täya, juka em tékkil, entok jáchin em yore nákehui, entok Diostat em éähui, entok kaa emo ámpoleka huatem jita joriähui, entok yánti éaka em jíapsahui, entok jú chúkula em yáakäu chë juebenakähui jú bat em yáakäu béppa.

²⁰ Tëne enchi béj-remta huatek jípure: Jüri jámut Jezabel aú profetä tíame ä éápo áman am majtia, të ä majtiabeyi am bäi táttähua, jume ín nésauta joame, am náyote kaa emo jubeka nau am tö íaaka, entok juka ídolommeu bíchaa näikiata am buātuaka.

²¹ Tëne béja taahuarim ä máksula, Diostau bíchaa ä jíapsi kuaktianakë béchïbo. Të kaa áu jíapsi kuaktia báare; kaa emo jubeka náu totóhuamta jíba boojoria báare.

²² Huári béchïbo ínapone kókoay ä böyëpo ä tahuatua, entok jume kaa ä jubeka áamak töyeme. Jiokot anhuäpone emo am bíttuanake, kaa türík áamak johuamta bétana kaa emo am jíapsi kuaktiako.

²³ Ä asoamne kókosi yáanake, bem kókkonakë béchïbo. Huanäi síme jume

igleesiam ä jüneriaka tahuanake, nee äjäriatukähui, kóbapo éerim éntok jiápsipo innéhuamta nee jüneriähui. Éntokne huéu-huëpulam ä máknake, juka enchim tekipanuaka kobakäu béekik.

²⁴ Të eme éntok, jume huatem Tiatirapo aneme, jume íkái doctrinata kaa jípureme, entok jume kaa ä täyame, juka Satanásta bétana obiachisi huémta, bempörim ä téttehuä bénasi, ínapone ínel enchimneu jiaahua: Kaitane béttek éntok enchimmet yéchanake.

²⁵ Të juka enchim jípurèhui, kuttem ä buísse, ín yepsäu tájti.

²⁶ Huaka yöokamta éntok ín tékil ériakamta simeta lüteu tájti, ínapone yäura úttiata ä máknake, naciónim, béppa.

²⁷ Huanäi tepa kutkutti ámet nésaunake, sisiguok jíbebiayi, éntokim ili sótöri babupo yári bénasim jámtiana, ín Áchay bétana ín ä mabetakä bénasi.

²⁸ Éntokne buere chókita kethuey yeu sisimemta ä máknake.

²⁹ Huä nákakame ä jikkaijnake, juka Espíritu Santota jume Cristota sualhuäpo nau animmeu ä nokähui.”

3

Jü nooki pueblo Sardisiu bíttuari

¹ 'Sardispo Cristota sualhuäpo nau animmeu ángeltahuë jiojte: “Jü guoy búsan Diosta espíritum jípureme, entok jume guoy búsan

chókkim, íkái nooka: Ínapone em tékil täya. Téhuame jípureka jíapsa, tērē mukila.

² ;Katē koptelaka simekuchē suuhua! Juka huatek emou tahualatē kutti nüye, kee jee ä lüteyo. Bueitukne ä bil-la, juka em joähui kaa ä yúmalähui, Diosta bíchäpo.

³ Áuhuē huáate, juka em mabet-läbehui, entok em jíkkaij-läbehui; éntoke ä éeriaka emo jíapsi kuaktia. Bueituk kocheka enchi aneyo, lak-ronta bénasine emou yebijnake. Éntoke kaa jüneenake ják horapo emou ín yebijnakēhui.

⁴ Tē yorememe kaa tua jaikim Sardispo jípure, bem súpem kee chicha yáame. Ímēri ínomakim rejtínake, totösalik sánkoka. Bueituk ínomakim rejtipó yúmala.

⁵ Jü yöokame tósalik sánkotuana entokne ä téhuam kaa tuchanake, jum libro jíapsihuäpo; entokne ín Áchayta bíchäpo ä téhuam yeu buijnake, entok ä ángelesim bíchäpo.

⁶ Huä nákakame ä jikkaijnake, juka Espíritu Santota jume Cristota sualhuäpo nau animmeu ä nokähui.”

Jü nooki pueblo Filadelfiau bíttuari

⁷ 'Filadelfiapo Cristota sualhuäpo nau animmeu ángeltahuē jöojte: “Íkái nooka jü santo, jü tua lütüriapo ájária, jü Davidta llavem jípureme. Jü ä éetapokäpo, kaabe ára ä pát-páttia; entok ä páttiakäu, kaabe ára ä étapo:

⁸ Ínapone juka em tékil täya. Íári béchibone em bíchäpo puerta étaporita tóij-la. Íkäri

kaabe ára ä páttia. Bueitukë kaa tua úttiak jïöbe, tërë ín noki ëeriala, éntoke ín téhuam kaa omoutela.

⁹ Ímine Satanásta sinagogapo anemene emou rúktia, jume kaa lútüriapo emo judíom tíame, tem kaa judíom, ál-lam ára nókichi. Ínapone emou am rúktituanake, entokne em guókpo emou tónnommea am jáptetuanake, am jüneenakë béchïbo, enchi ín nákéhui.

¹⁰ Bueituk juka noki kaa huanti jiapseka ä bobitchaka em ériakä béchïbo, ínapo ket enchi érianake, hua taahuarit sime ániat jïokot anhuäpo, jume ániat buíapo jiápsame jïöbïla béchïbo.

¹¹ Èni ímï, ínapo läuti yebijnake. Em jípurëhuë kutti buísse, bueituk juka em coorona, kaabeta enchi ä úhuaanakë béchïbo.

¹² Juka yöokamta, ín Diosta tiöpopone ä pilar kechanake, entok huämi kaibu éntok yeu simnake. Entokne ín Diosta téhuam át jïojtenake, entok ín Diosta buére jóära téhuam, jü Jerusalén bemela. Ìri ín Diosta áttia, téhueka bétana kóm huéiye. Entokne ket ín bemela téhuam át jïojtenake.

¹³ Huä nákakame ä jikkaijnake, juka Espírituta jume igleesiammeu ä nokähui.”

Jü nooki pueblo Laodiceau bíttuari

¹⁴ 'Laodicea Cristota sualhuäpo nau animmeu ángeltahuë jïojte: “Jü júnentume, jü huitti ä bíchakäu lútüriateme, jü kësam huëpo sime Diosta yáakähui, ínel jiaahua:

¹⁵ Ínapone em tékil täya. Katë sébbe, éntoke kaa tátta. ¡Bueítuk chë türi éiyey, empo sébiako, o táttaytuko!

¹⁶ Të ili enchi súkkatukä béchïbo entok kaa sébeka kaa em táttaakä béchïbo, ín tempone enchi yeu bísatnake.

¹⁷ Bueítuk empo ínel jiaahua: Ínapone riiko, entokne chë rikutula, entok kaita inou bëye. Të katë jüneiya, kaita al-leehuamta emót ayuakähui, éntoke jiokot maachi. Poobëe, líptie, éntoke kaa sánkok.

¹⁸ Huári béchïbo ínapone consejota enchi mákka: orota táijpo buásatane inou enchi jínnü íaa, em rikutunakë béchïbo. Éntoke súde tósalm jínnuka am sánkote, kaa tiusi bichitaka em hueramnakë béchïbo. Éntoke koliiriota em pújpo huáttia, em bínnakë béchïbo.

¹⁹ Ínapone kutti nokaka kökosi am bébba, jume sïmem ín nákehui. Íari béchïbo emuë ériaka, emo suaya éntoke emo jíapsi kuaktia.

²⁰ Ínapone én ímï puertata poona. Bueítuk jábe ín nokäu jíkkajaka, juka puertata étapokátek, áune kibaknake, entokne kúptey áamak jïbuänake áapo entok ínomaki. ²¹ Juka yöokamta, íno náaponä yejtetuanake, ín banko rey nésaupo, jachin ín yöoka entok banko rey nésaupo ín Áchaymak nee yejtekä bénasi.

²² Huä nákakame ä jikkaijnake, juka Espíritu Santota jume Cristota sualhuäpo nau animmeu ä nokähui.”

Jü téhuekapo Diosta yörihuähui

¹ Chúkula ikäi simsuko anä bitcha, téhuekapo puerta étaporita; Jü jáhui bát huéeme ín jíkkajakähui, trompeeta jáhuita bénasi inou nookak, ínel jíaka:

—¡Ábe jámu! Huanäine enchi am bíttuanake, juka chúkula yeu huéenakemta, íkai simsuko.

² Huanäine sej chukti Espíritu Santopo taahuak. Íneline banko rey nésaupo téhuekapo yéchata bitchak, jum banko rey nésaupo éntok, seenuk áma kátekamta.

³ Jü áma kátekame éntok, téta jaspe entok cornalina ténaakay. Jum banko rey nésaupo chíkola éntok senu kurues ama órekay, esmeraldata bénaaka.

⁴ Jum banko rey nésaupo chíkola, veinticuatro banko rey néosaurim jokay. Veinticuatro yoiyoturim áma jokamene bitchak, totösalik sánkokame, coroonam oropo yáarim kóbat jípureka.

⁵ Jum banko rey nésauta hétuk éntok, yúku bérokti entok yúku omtira jáhuimak áma yeu huéiyey. Jü banko rey nésauta pújapó éntok, guoy búsan lámparam tájiy béetey. Íméri beja jume guoy búsan Diosta espíritum.

⁶ Jü banko rey nésauta pújapó éntok, bahue bík-riota bénaka áma bókay, cristalta bénaka.

Jü banko rey nésauta chíkola éntok, jume naiki jíápsame áma jábuekay, pújapó entok amatana yún puseka.

⁷ Jü bát huéeka jíápsame leonta bénaakay. Jü guósa huépo huéeme éntok, beceerota

bénaakay. Jü bájikun huëpo huéeme éntok,
yorem pújbata bénak pújbakay. Jü naikiku
huéeme éntok, águila nilata bénaakay.

⁸ Jume naikika jiápsame éntok,
huéhuëpulakam búsan másam jípurey. Áme
chíkola entok bétuku pusimmeyim tápuniakay.
Taahuapo entok tukaarit naa búrujti katim
yáateka ínel jiaahuay:
Santo, santo, santo,
jü Señor Dios,
ä úttiäray simeta ára joame,
hua jiápsaïhui, entok jiápsame,
entok hua äbo yebijnakeme.

⁹ Entok jíbba huame jiápsaka ä baysahueme
lóoriata entok yörisi maachik banko rey
nésaupo kátekamta am máká bélëki, juka síme
huásu-huásuktiapo jiápsamta,

¹⁰ jume veinticuatro yoiyöturim áahuim
tónommia jájapte, jü banko rey nésaupo
kátekamta pújbapo, entokim ä yöre, juka
huásu-huásuktiapo jiápsamta; entokim bem
coroonam banko rey nésaupo kátekamta
pújbapo öore, ínel jíaka:

¹¹ Señor, empo ä mabetpo yúmala,
juka lóoriata, entok em yörihuamta,
entok juka úttiärata;
bueituk empo simeta yáala,
entok em ínel éäpom ayka,
entokim yáataka ímï aayuk.

5

Jü Kabara entok jiösia bëtiari

¹ Huanäine jü banko rey nésaupo kátekamta bátatana mámpo, senu librom órekame bitchak. Huáijhuatana entok yeutana át jïojterim, guoy búsan sellokari.

² Huanäine senu ángelta úttia yaurata jípuremta bitchak, tüisi kusisi chayeka nátemajemta:

—¿Jábesu chë yörisi machi jáni, librom ä étaponakë béchïbo?, entok, ¿jume sellom ä búttianakë béchïbo?

³ Kaabe aaney, téhuekapo, buíapo, entok buíata bétuk junne, jü jábe ára liibrom étaponakeme, entok kía am bít béchïbo junne.

⁴ Huanäine tüisi buan táytek, yúmalasi au jípuremta kaa téyhuaka béchïbo, bueítuk kaabe ára librom étapoy, entok kaabe ára am bitchay.

⁵ Huanäi senu yöturi ínel inou jiaahua:

—Katë buaana, bueítuk jü León Judáta yoremempo yeu simlame, Davidta bétana yoiyöturimmet yeu tómtilame, yölataka áma yeu simla. Jüri ára am étapo, jume liibrom, entok jume guoy búsan seellom ára búttia.

⁶ Huanäine jü banko rey nésauta násuk entok naiki jiápsaka áma aneme násuk, entok yoiyöturim násuku, Kabaratane áma huéekamta bitchak. Mukiapo tóij-ritaka kökosi yáarita bénaakay. Guoy búsanim ahuakay, entok guoy búsanim pusekay. Huámëi ínel jume guoy búsan Diosta espíritum sime ániat bíttuarim.

⁷ Huanäi banko rey nésaupo kátekamtau rúkteka, librom ä bátatana mámpo ä jípurëu nūka.

⁸ Huanäi jume librom ä nüko, jume naiki jíápsaka áma aneme entok jume veinticuatro yoiyöturim jü Kabaratahuim tónommia jáptek. Símetakam arpam jípurey, entokim copam oropo yáarim jípurey, inciensoy tatapunim. Ímëi jume santom oraciónim.

⁹ Entokim bemela buikim buiikay, ínel jíame: Émpë am nüpo yúmala, jume liibrom, entok sellom em étaponakë béchïbo; bueïtuk empo jiokot yáahuaka mëhuak, éntoke em ójboy Diosta béchïbo itom jínruk, síme yóremraata, entok yún täbuiasi nokame, entok pueblom, entok naciónim.

¹⁰ Éntoke Diosta béchïbo réyesim entok sacerdotemsi itom yáala.

Huanäite ímë buíapo nésaunake.

¹¹ Huanäine banko rey nésaute entok jume jíápsaka áma aneme entok jume veinte áma naiki yoiyöturim chíkola, ángelesim jíahuiatane jíkkajak, entokne am bitchak. Ímëi juebena millonimtukay.

¹² Tüisim kusisi ínel jiaahuay: Jü Kabara jiokot yáataka mëhuakame, jüri am mabetpo yúmala, juka úttiärata, juka rikorata, jita täyahuamta, juka tüisi úttiata, juka ä yörihuaka entok símek béppa uyjóriata, entok juka ä úttiähuähui.

13 Entok sime jü téhuekapo yáari, entok buíata béppa, entok buíata bétuku, bahuepo ayukame, simetaka náu lópola ínëlim jiaahuay: Jü banko rey nésaupo kátekamtahui, entok Kabaratahui, bempörim béchibotunake, jü úttihuame, jü yörihuähui, jü simek béppa ujoyória, entok jü yäura úttiära, jíba huásu-huásuktiapo.

14 Jume naikika jiápsaka áma aneme ínëlim jiaahuay:

—¡Júnentunake!

Huanäi jume veinticuatro yoiyöturim bem pújammeyim múmula chätuka ä yörek, juka jíba yü huásu-huásuktiapo jiápsamta.

6

Jume seellom

¹ Huanäine Kabarata bitchak, sellota huépülak ä étapoko. Jume naikika jiápsaka áma aneme násukne huépülak jíkkajak, yúku omtemta bénasi jíamta:

—¡Binë huéeka ä bitcha!

² Huanäine ä bitchak, kábay tósalista. Huä át jikat kátekame entok, kúta huíkóta jípurey; entok huépü coroonata mákhuak. Huanäi yöoka áma yeu siika, entok jíba yösimey.

³ Juka guosa huëpo sellota Kabarata ä étapoko, juka guosa huëpo jiápsaka áma anemtane jíkkajak, ínel jíamta:

—¡Binë huéeka ä bitcha!

⁴ Huanäi júchi senu kábay áma yeu siika, kutkosi síkirika. Huä át kátekame éntok, úttiärata mákhuak, juka yánti jíapsihumta buíapo ayukamta ä tejalnakë béchïbo, entok emo am súanakë béchïbo. Huanäi bueürum ejparam mákhuak.

⁵ Juka sellota bájikum huémta ä étapoko, juka bájikum huëpo jíapsaka áma anemtane jíkkajak, ínel jíamta:

—¡Binë huéeka ä bitcha!

Huanäine senu kábay chukurik bitchak. Jü át kátekame éntok, ä mámpo bajkulata jípurey.

⁶ Huanäine senu jíahuita jíkkajak, jume naikika jíapsaka áma aneme násuku, ínel jíamta:

—¡Senu kilo tirijkom, senu taahuari tékiltam béj-re! Éntok, ¡báij kilo cebaadam, senu taahuari tékiltam béj-re! Të juka aceiteta entok vinota, ¡katë áu suuhua!

⁷ Juka sellota naikikum huémta ä étapoko, juka naikikum huëpo jíapsaka áma anemtane jíkkajak, ínel jíamta:

—¡Binë huéeka ä bitcha!

⁸ Ámanne remteka kábay sahuarik bitchak. Jü át kátekame éntok, muerte ti téhuaakay. Jü infierno éntok, áa sáu huéiyey. Huanärim úttiata mákhuak, buíata naikisi näikimterita huéeläpo, ejparammea am súanakë béchïbo, tébaayi, kökoayi, entok animal yoyolika buíapo anemmeyi.

⁹ Juka sellota mamniku huémta ä étapok, altarta bétukne am bitchak, jume Diosta bétana

bem nokakä béchibo kókkolame, entok huitti Diostat éaka bem jiápsakä béchibo.

¹⁰ Entokim úttesi kusisi chaayey, ínel jíakari:

—¿Jauhuey tájti, Señor, santo entok tua ájáriame, Akë am bíttuanake, juka em úttia yäura, éntoke itom ójbo am béjtutuanake, jume ímĩ buíapo jiápsame?

¹¹ Huanärim súde totösalim mákhuak, entokim téjhuaahuak, júchi chúbala jimyore sáyhuaka, jume Cristota súalhuäpo ámemak anim yumäu tájti, entok bempörim bénasi két am kókkonakë béchibo.

¹² Juka sellota búsaniku huémta ä étapokne ä bitchak. Huanäi jü buía tüisi áu yoyöak. Jü tää éntok, chukurisi taahuak, lutu sánkom bénasi. Mecha éntok tókti síme ójbota bénasi taahuak.

¹³ Jume chókim éntok, téhueka bétana buíau kón huáttek, juka chuna óguota takam kón huáttia bénasi, jekata tüisi úttiaka am yoyoako.

¹⁴ Huanäi jü téhueka kaitatuk, jiösiata buekak náu bitiahuaka bénasi. Entok síme káuhuim, entok bahuepo káhuim yeu jokame, sékänam jotek.

¹⁵ Jume buíapo reyim, entok jume buéresi ériahuame, jume riikom, jume capitanim, jume yäurata jípureme, entok síme sáyhuaka, entok kaa sáyhuaka aneme, káu guójökum éusuk, entok júyapo téta buérem násuku.

¹⁶ Huanärim juya káhuimmeu entok téta buéremmeu ínel jiaahua:

—¿Ítochem kón huátte, éntokem itom éso, hua yörisi machi banko yäurapo kátekamta

bétana, entok Kabarata ómtira ito béppa ané
bétana!

¹⁷ Bueituk jü buére taahuari bem ómtira béja
yuumak. ¿Jábesu ára óusi huéeka taahuanake
jäni?

7

Jume ciento cuarenta y cuatro mil sellotuarim

¹ Íkai simsuk éntokne naiki ángelesim
jäbuekame bitchak, ánia buíapo naiki kätana
bëkatana. Júmei béja jekata këtchalatukay,
jákun bíchaa junne, kaa jek äaaka, buíata
béppa, bahueta béppa, entok kía jita júyata
béppa junne.

² Täbui ángeltane ket bitchak, täata yeu hué
bétana, jikau huémta, entok Dios jíápsamta
sellota jípurementa. Huanäi tüisi kusisi ámet
cháchayek, jume naiki ángelesimmechi, jume
úttiärata mákhuakammechi, buíatau entok
bahuetau kaa tühuata bem ámeu yáanakë
béchïbo, ínel ámeu jíaka:

³ —Kátem bát áu suuhua, jü buíatahui entok
bahuetahui entok júyammeu junne, Diosta
nésauta joame kóba méjëku sellota itom am
óresuk jübua.

⁴ Huanäine am jíkkajak, am jaikitukähui,
jume sellotuarim: ciento cuarenta y cuatro
miltukaimme, sime jume Israelta úusimmet
yeu sákalame.

⁵ Judátat yeu sákalame, dóoce mil
sellotuarim; Rubéntat yeu sákalame, dóoce mil

sellotuarim; Gadtat yeu sákalame, dóoce mil sellotuarim;

⁶ Asertat yeu sákalame, dóoce mil sellotuarim; Neftalítat yeu sákalame, dóoce mil sellotuarim; Manaséstat yeu sákalame, dóoce mil sellotuarim;

⁷ Simeóntat yeu sákalame, dóoce mil sellotuarim; Levíitat yeu sákalame, dóoce mil sellotuarim; Isacartat yeu sákalame, dóoce mil sellotuarim;

⁸ Zabulóntat yeu sákalame, dóoce mil sellotuarim; Josétat yeu sákalame, dóoce mil sellotuarim; Benjamíntat yeu sákalame, dóoce mil sellotuarim.

Juebénaka totösalik sánkokame

⁹ Íkái simsuk éntok, juebena yóremraata síme naciónimpo jomemne bitchak, entok yóremraata kaa náu anim entok pueblom kaa nánálaik nokame, banko reypo kátekamta bíchäpo jäbuekame, entok Kabarata bíchäpo, totösalik sánkokame, bem mámpo éntok tako sáhuata jípureme. Ímëi éntok kara näikiatuy.

¹⁰ Entokim tüisi úttia chaayey, ínel jíakari: jJü jínëuria Dios banko reypo kátekamta bétana huéiye, entok Kabarata bétana!

¹¹ Entok síme ángelesim banko reyta, entok jume yoiyöturim, entok jume naiki jíápsaka áma aneme, chíkolam jäbuekay. Huanärim banko reyta bíchäpo tónommia jáptek, kóm chätuka. Diostam yöreka ä úttilek,

¹² ínëli jíaka:

¡Júneltunake! ¡Jü Diosta tühua, entok jü looria,
 entok jita täyahuame,
 entok jü Diosta baysahueka jíapsihuame,
 simem béppa yörihuame, jü úttiära,
 entok jü úttia kaa lüteme,
 itom Diosta béchibotunake,
 jíba yü huásu-huásuktiapo! ¡Júnentunake!

¹³ Huanäi senu yöturi inou nookak, ínel jíaka:

—Ímëi totösalik sánkokame, ¿jábessamme?
 Entok, ¿jákun bétanasum äbo yáij-la?

¹⁴ Ínapo éntok ínel áu jiaahua:

—Señor, émpë jüneiya.

Huanäi áapo ínel inou jiaahua:

—Ímëi ínel jume úttesi jìokot anhuäpo entok
 kökosi machikuu yeu sákalame, entokim bem
 sánkota báksiala, entokim Kabarata ójbopo
 totösalisi am básuala.

¹⁵ Íäri béchibom Diosta banko rey kátekamta
 bíchäpom aane. Entokim taahuarit entok
 tukaarit naa búrujti ä tiöpopo ä nésahui johua.
 Jü banko reypo kátekame éntok ä jöota áme
 béppa cháanake.

¹⁶ Katim napat tébäurinake, entokim kaa
 júchi bäi kókkonake. Jü täa kaa áme
 béppatunake, entok jita táttaria júne kaa ámeu
 ayunake.

¹⁷ Bueituk jü Kabara banko rey násuk aneme
 am suayanake, entok bäa jíápsame yeu huëu
 bíchaa ámepat huéesimnake. Dios éntok jume
 bem pusim ópua tútenake.

8

Jü guoy búsan seello

¹ Juka guoy búsan sellota ä étapoko, jum téhuekapo yánti taahuak media horata huéeläpo.

² Huanäine guoy búsan ángelesim Diosta bíchäpo jäbuekame bitchak. Huanärim guoy búsan trompeetam mákhuak.

³ Chúkula täbui ángel áma yepsak. Huanäi altariu kíktek, inciensota áma táttaahuäpo oro áusülik jípureka. Huanäi yún inciensota mákhuak, jume Diosta súaleka oraciónta joammak nahuä kütianakë béchibo, oro altarta béppa banko reyta pújbapo.

⁴ Huanäi juäri ángelta mámpo yeu siika, Diostau bíchaa, jü inciensota buiichia, jume Diosta súaleme oraciónmak náuhui.

⁵ Jü ángel éntok, incensariota nüka. Huanäi óbammea ä tápuniak, altarpo ayukammeyi. Huanäi buíau kóm ä guötiak. Huanäi yúku omtiriam ayu táytek, éntok jíahuim, éntok yúku béroktiriam; buía éntok két áu yoyoak.

Jume trompeetam

⁶ Huanäi jume guoy búsan ángelesim guoy búsan trompeetam jípureme, akim am kujtaytek.

⁷ Jü ángel bát huéeme trompeetata kúkusek. Huanäi téjam entok táji ójbomak náu kütiahuak. Ímëri buíata béppa kóm guötiahuak. Huanäi jü júya bueere báisi näikimteri huéeläpo béekika tájjak, entok síme jü báso síali tájjak.

⁸ Jü ángel guoyiku huéeme trompeetata kúkusek. Huanäi júya káhui buëuruta bénaaka, táijpo béeteka, bahuéu kóm jímmaahuak. Huanäi jü bahue báisi näikimteri huéeläpo béekika ójbosi áu yáuhuak.

⁹ Huanäi bahuepo jiápsame kókkok, jü báisi näikimteri huéeläpo béekika, entok jume barcom két tejalhuak, báisi näikimteri huéeläpo béekika.

¹⁰ Jü ángel bájiku huéeme trompeetata kúkusek. Huanäi téhueka bétana huépul chóki buëuruka kachimbata bénasi béeteka kón huétchek. Huanäi jume bathuem entok báam yeu huëpo báisi näikimteri huéeläpo béekimmet kón huétchek.

¹¹ Jü chóki éntok, “Chiburá” ti téhuaakay. Huanäi jume báam báisi näikimteri huéeläpo béekika chibusim aayuk. Huanäi yún yóremraa kókkok, jume báam chibusi ayuká béchibo.

¹² Jü ángel naikipo huéeme trompeetata kúkusek. Huanäi jü tää báisi näikimteri huéeläpo béekika kaa türika taahuak; anéli ket jü meecha, entok jume chókkim. Júnelim kaa machisi taahuak, juka báisi näikimteta ámet ayukamta, kaita machiriata ayunaké béchibo, taahuata báisi näikimteri huéeläpo béekika, entok tukaapo junne.

¹³ Sepne ä bitchak, entokne ä jíkkajak, senu ángel téhueka násuk nēkamta, ínēli kusisi jíamta:

—¡Ay, ay, ay, jume buíapo jiápsammehui!
¡Bueitukim abe trompeetam kuuse, jume huate báij ángelesim!

9

¹ Jü ángel mamniku huéeme trompeetata kúkusek. Huanäine téhueka bétana senu chókita buíau kón huéchemta bitchak. Entok tüisi mékka kóm guójöriata llavem mákhuak.

² Huanäi juka guójöriata tüisi mékkak kömik étapok. Huanäi jü buiichia áma jikau siika, orno bueürupo buichiata yeu hué bénasi. Huanäi jü tää entok jü jeeka kaa machisim taahuak, jü buichiria guójöriapo yeu huémta béchïbo.

³ Jum buichiapo éntok, guöchim yeu sájjak, entokim buíau kón huáttek. Huanärim útteata mákhuak, machilim buíapo aneme bénasi.

⁴ Huanärim júya síarita buíapo ayukamta kaa nasonte sáyhuaka téjhuaahuak, entok jita síarik junne, entok jita buére júyata junne, ál-la yoremem kaa Diosta seello kóba méjériat jípureme.

⁵ Të katim am súa iaahuaka téjhuaahuak; kíalim kökosi kaa pappehuamta ámeu joö iaahuay, mamni metpo. Jü bem jóuguo éntok, machil jujariata bénasi kökosi kaa papperisi ínnëtuy.

⁶ Huámechï taahuarimmet éntok, jume yoremem kókkohuamta jariunake, të kaibum ä téunake. Entokim kókkko péenake, të jü kókkohuame am tö búitinake.

⁷ Jume guöchim éntok, kábäim náu nássuahuäu bíchaa kateme bénasi jita jípurey. Kóbat éntokim coroonam oro áusülisi náu yáari bénom jípurey. Jü bem pújba éntok, yoremta pújba bénaakay.

⁸ Jume chonim éntok, jámutta chomin bénaakay. Támim éntok, leonim támim bénaakay.

⁹ Bem takahuam éntok sisiguok súpem bénakim jípurey, sontarom bénasi. Bem másam jáhui éntok yún kábäim carrom náu nássuahuäu bíchaa tennë bénasi jíkkajtuy.

¹⁰ Machilim bénasim buásiakay, entokim bem buásiapo jikiam bénasi ä jípurey. Bem buásiampo éntokim jóguota jípurey, mamni metpo jume yoremem bem kökosi jonákë béchïbo.

¹¹ Éntok jü ángel guójöriapo mékka kóm yeu simlame áma reytaka néshuey, bempörim béppa. İri éntok hebreo nokpo Abadón ti téhuak; griego nokpo éntok, Apolión.

¹² Jü jikot jiahuame bát huéeme simsuk, të ketune guoyika bëye.

¹³ Jü ángel búsanipo huéeme trompetata kúkusek. Huanäine senu jáhuita jíkkajak, naiki ahuám násuku oro altar Diosta bíchäpo órekaïpo.

¹⁴ Jü ángel búsanipo huémtahui, juka trompetata jípuremtahui, ínel jiaahuak:

—Jume naiki ángesimë búttia, buére bathue Eufretesta náapo súmarim.

¹⁵ Huanärim búttiahuak, jume naiki ángesim, juka yóremraata báisi näikimteripo huéeläpo bekik bem súanakë béchïbo, bueïtukim huäri horata, taahuata, metta, éntok huásuktiriata béchïbo yeu púaritukay.

16 Jume sontarom kákabäeka näikiahuakamene jikkajak. Guoy cien milloonimtukayme.

17 Júnelne am bitchak, jume kábäim, tenkupo bénasi, entok jume ámet josakame: Bem táhuichim sisiguokiy emo páttialatukay, síkilika táijta bénaaka, kútkosi tehuelika jacinto ténasi, entokim sahuaritukay, azufre ténasi. Jume kábäim éntok, leónta bénak kókobakay. Bem tempo éntok, tájji, buichiria, entok azufre yeu huéiyey.

18 İri báij huépo chibuk jekakä béchibo, jü yóremraa báisi näikimteri huéeläpo kókkok, jü táijta, buichiriata entok azufreta béchibo; bem tempo yeu huémtayim ínel aayuk.

19 Jume kábäim úttiära bem tempo entok bem buásiat ayukay, bueituk jume bem buásiam bakochim bébenaakay. Bem kóbay éntokim jábeta kókosi johuay.

20 Jü huate yóremraa, İri chibu jeka yeu sikamtay kaa kókkokame, íkärím bíchaka júne kaa emo jíapsi kuaktiak, kaa türík bem joäu bétana. Jume lemooniom bem yörëu júnem kaa tójjak, oropo yáarim, tómi tósalipo, broncepo, tétapo entok kútapo yáarim junne. Ímëi ídolum; katim bitcha, katim jikkaja, entokim kara naa kaate.

21 Entokim kaa emo jíapsi kuaktiak, jábeta bem mèlatukä bétana, móriata bem boojoria bétana junne, kaa emo jubeka náu jíapsihuatma bétana junne, entok bem jita ékbuä bétana junne.

10

Jü ángel ili librommaki

¹ Senu ángelta úttiakamtane bitchak, téhueka bétana kómhuémta namupo bítiataka ä kóba béppa éntok, kuruejta jípurey. Ä pújbahua éntok täata bénaakay. Ä guókim éntok táij béeteka jikau rúpaktemta bénaakay.

² Ä mámpo ili libro étaפורim jípurey. Huanäi bátatana guókimmea bahueta béppa cheptek. Jume míkötana guókimmea éntok, buíata béppa.

³ Huanäi tüisi kusisi cháchayek, leónta omteka ä jíä bénasi. Ä cháchaysuk éntok, guoy búsan yúku omtiriam jáhuim jikkajtuatobok.

⁴ Jume guoy búsan yúku omtiriam jiausuk, ínapone am jïojte báarey. Të téhueka bétana senu jáhuitane jikkajak, ínel ínou jáamta:

—¡Akë am sellotua! ¡Katë yeu am buïbuisse, jume guoy búsan yúku omtiriam nokakähui, éntoke kaa am jïïojte!

⁵ Jü ángel bahueta béppa éntok buíata béppa huéeka im bíchakähui téhuekau jikau mámtek.

⁶ Juka jíba yü huásu-huásuktiapo jiápsamtau, ä noki perentak juka téhuekata yáalamta éntok juka áma ayukamta, buíata éntok juka áma ayukamta, bahueta éntok juka áma ayukamta, bát kéchaka, ínel jiaahuak:

—Síme ánia búiteme béja chúpuk.

⁷ Ál-la jü guoy búsan ángelta jáhui taahuarim yúmako, juka trompeetata béja ä kuj táyteko, juka Diosta éhuil éсотaka jípurehui

ál-la sime chúpilataka tahuanake, áapörík jume ä nésauta joame éntok profeetam ä téjhuaakäpo ámani.

⁸ Jü jáhui téhueka bétana ín jíkkajakähui júchi ínou nookak. Huanäi ínel jiaahua:

—Jü ángel bahueta béppa entok buíata béppa huéekamtahuë huéiye. Huanärë jume ili libro étaporim ä mámpo ä jípurëhuë nüye.

⁹ Huanäine jü ángeltau siika, jume ili librom nee ä mák sáhueka. Áapo éntok ínel ínou jiaahua:

—Jínya, Akë am buäye. Huanäi em tópapë chibusi ámey éenake. Em tempo éntokim kákkanake, mumu sítörim bénasi.

¹⁰ Huanäine jume ili librom ángelta mámpo nüka, entokne am buäka. Huanärim ín tempo mumu sítörim bénasi kákkaka taahuak. Të nee am buäsuk éntok ín tópapone chibusi ámey éiyak.

¹¹ Huanäi áapo ínel ínou jiaahuak:

—Úttia júchi bénasi én em noknakëhui, juka nokta Diosta bétana emou kóm yúmamta, büru pueblom bétana, naciónim bétana, tattäbui nókta nokam bétana, entok reyim bétana.

11

Jume guoyi Diosta testigom

¹ Huanäine ili bakata mákhuak, áy jujünaktehuä bennak. Huanäi ínel ínou jiaayhuak:

—¡Kiktëe! Huanäi éntoke juka Diosta tiöpo jünakte, entok juka altarta, éntoke am näikia, jume áma ä úttileka ä yöreme.

² Të juka tebatta tiöpo päku yeutana órekamta, yehuë ä bëa. Katë ä jújünakte, bueítuk kaa judíom mámpo tóij-ri. Bempo éntok át chécheptisunake, cuarenta áma guoy metpo, jü Diosta buére pueblo santopo täyahuamtachi.

³ Huanäine jume guoy testiigom íno bétana noknakeme, mil guoy ciento áma sesenta taahuarimpo, ámanne am bíttuanake, chukurik lutuka sánkokame.

⁴ Ímëi íno bétana nokame, jume guoy oliivom entok jume guoy kanteelam áma jájãbohuähui, bëja buíapo anemta Diosta bíchãpo jábuekame.

⁵ Jábeta kökosi am yáa báareyo, táji bem tempo yeu sisime, jume am béj-reka kateme táa báreka. Jábe junne kökosi am yáa báreka éáteko, alë bénasi mukpo yúmala.

⁶ Ímëi úttiärata jípure, téhuekata bem páttianakëhui, kaa yúknakë béchïbo, Diosta noki bem nokäu tájti. Entokim úttiärata jípure, báam ójbosi bem am yáanakë béchïbo, entok buíata béppa chibu jekata ayunakë béchïbo, jaikisi bem ínel éäpo.

⁷ Jume testiigom Diosta bétana noksuko, jü animal máusi maachi guójöria mékka kóm bétana jikau huéeme, ámemak náassuanake, entok yólataka áma yeu huéenake, entok am súanake.

⁸ Jume bem takahuam éntok, buére jóära itom Señorta kúrusit poponhuakapo yeu

töritaka tahuanake, bueituk täbuiasi
téhuaahuäpo Sodooma entok Egipto ti
téttehuaahua.

⁹ Entok jume sime pueblompo joomem,
famiiliam, entok kaa nanälaisi nokame, entok
sime naciónim,, bem takahuam kókkolame
áma bínnake, báij taahuari áma meeliapo,
entokim jíba kaa am mäatebonake.

¹⁰ Jume ímī buíapo béppa jíápsame úttesim
al-leenake, am kókkokä béchibo. Huanärim
tepa al-leaka nátepua náu jita emo miknake.
Bueituk ímēi guoyika Diosta bétana nokame,
kókosi machik jita ámeu yáalatukay, jume ím
buíapo jíápsammehui.

¹¹ Tē báij taahuari áma meeliam huéeyo, jü
espíritu jíápsame Diosta bétana ámeu bíttuari
ámet kibakek. Huanärim jíabetaka jáptek.
Sime jume am bíchakame éntok guómtek;
huanái tüisi maujra amet huetchek.

¹² Huanäri jume guoy testiigom jáhuita tüisi
úttiakamta téhueka bétana nokta jíkkajak, ínel
ámeu jáamta:

—¡Äbem jikau kaate!

Huanärim namupo téhuekau bíchaa jikau
jämuk. Huame am béj-reka am sáayokame
éntok am bitchak.

¹³ Huämi horapo buía tüisi áu yoyoak. Íäri
béchibo, guoj mamnita näikimteri huéeläpo
huétchek jü buére jóära, buíata áu yoyoakä
béchibo, entok guoy búsan mil yoremem
kókkok. Jume huate éntok, tüisim májhueka
taahuak. Huanärim Diosta téhuekapo
kátekamta úttilek.

14 Jü jìokot jìayhuame guoy huèpo béja
simsuk. Én éntok, jìokot jìayhuame bájipo
huéeme läuti äbo huéiye.

Jü trompeeta guoy búsanipo huéeme

15 Jü ángel guoy búsanipo huéeme
trompeetata kúkusek. Huanäi buére jáhuim
téhuekapo jikkajtuk, ínel jákari:
Jume reyimtaka néshueme ániat ayukame,
ítom Dios entok ä Cristo am áttiaka tahuanake.
Áapo éntok nésaunake jíba yü
huásu-huásuktiapo.

16 Jume veinte áma naiki yoiyöturim, Diosta
bíchäpo bem banko yäurapo jokame,
tónommeyim jáptek kóm chätuka, huanärim
Diosta yosireka ä úttilek,

17 ínel jáka:

Enchite baisauhue, Señor Dios,
símeta ára joame,
empo jíba aneme,

entok jíba anèihui, entok äbo yebijnakeme.
Bueítuk juka tüisi yäura úttiärata, bėjë ä nüla.
Entok em nésaunakèhui, bėjë ä naatela.

18 Jume naciónim, éntok öomtek;

jü em kaa al-lea ómtira éntok yuumak.
Jume kókkolammet bette noki em
chúpanakèhui éntok két yuumak.

Entok kétchi, jume em nésaunta joame, jume
profeetam,

jume enchi súaleme, jume em téhuam yöreme,
kaa buéresi emo ériame entok buéresi emo
ériame yörihuame junne,

Akë am béjtuanake, juka sime tühuata bem
kobaka jájamlähui.

Éntoke am tejalnake, jume buíat ayukamta
tejaleme.

¹⁹ Huanäi jü Diosta tiöpo étapohuak
téhuekapo. Jü altar kajón huáijhua órekame
éntok ára bíttuka taahuak. Huanäi yúku
béroktiriam ruruti omteka jiaahuak, éntok buía
áu yoyoak, éntok buéresi téjam huáttek.

12

Jü jámmut éntok jü dragón

¹ Senu señal buéresi téhuekapo yeu machiak:
senu jámmut, täata súpekari. Ä guókpo éntok
mecha órekay. Ä kóba béppa éntok, coronata
guoj mamni áma guoyim chókekamta.

² Asoa báreka éntok, huantiriammea tēiney,
bueítuk jü asoa huantiriam béja áu
yúmalatukay.

³ Huanäi jútchi, senu señal téhuekapo yeu
machiak: senu dragón kútiko síkiri tüisi
buëuruka, guoy búsaním kóbakay, éntok guoj
mammim ahuakay. Jume kóbam éntok
huehuëpulaka guoy búsan ili coronam
jípurey.

⁴ Ä buásia éntok, jume chókim téhuekapo
ayukame báisi näikimteri huéeläpo béekim am
huíksimey. Huanäi buíata béppa chíbela am
guötiak. Jü dragón éntok kíktek, jámut asoa
báaremtau yúmakari, ä asoa yeu tómték sep ä
buä báreka.

⁵ Huanäi jü jámut ili outa asoak. Íri béja áma yeu púatukay, kuttílasi ámet nésau iaahuaka, sime jume naciónimmechi. Huanäi jü jámut usi outa asoaka sep ä úhuahuak, Diosta reytaka ä anëpo ä annakë béchïbo.

⁶ Jü jámut éntok mékka ánia see päriau bíchaa búitek; Dios júkai áa béchïbo näikialatukay, jum ä annakeïpo. Áma aneka, simeta ä huáatiäu jípunake, mil guoy ciento áma sesenta taahuarimpo.

⁷ Chúkula éntok, téhuekapo buere nássuahuak: Jü arcángel Míkkel éntok ä ángelesim dragóntamakim nássuay. Jü dragón két jume ä ángelesim huériaka, jü Míkeltamak nássuak,

⁸ tërim kaa yöok. Huäri béchïbo téhuekapo kaitam áma jípureka taahuak, jü dragón entok jume ä ángelesim.

⁹ Huanäi päkun yeu béebiahuak, jü buere dragón, jü baakot binhua jauhuey naateka aneme, jü diablo entok Satanás ti két téttehuaahuame. Íri sime ániata bäi táttähua. Sime ä ángelesimmak békti buíau kóm béebiahuak.

¹⁰ Huanäine jíahuita kusisi jíamta jíkkajak téhueka betana, ínel jíamta:

—Äbo yebij-la béjja jü jínëuria, entok jü úttiära, entok itom Diosta reytaka nésahuëhui, entok juka Cristota nésahuëhui. Bueituk béja yeu béebiahuak, jü kaa tühuata am joä tíaka jíba am nätuame, jume itom sailam. Jüri béja tukaarit entok taahuapo naa búrujti itom Diosta bíchäpo am nätuay.

¹¹ Itom sailam éntok Kabarata ójbo guötiakamtayi entok Diosta nésauo jiápsaka bem nokähui, huáayirim yölataka yeu sájjak; entokim bem jiápsim jünem kaa beutirek, bem kókkou núkisi.

¹² ¡Ílari béchibem al-leiya, síme jü téhueka, entok eme áma jiápsame! ¡Jume huatemmeu ál-la tepa jiokot machisi ámeu huéenake, jume buíapo entok bahuero jiápsammehui, bueítuk jü diablo, tüisi kujtiaka entok omteka, enchimmeu kóm simla; jüneiya kaa jaiki taahuarim áu bëyëhui!

¹³ Jü dragón, buíau áu kóm béebiahuakau jüneriaka, juka jámutta ili outa asoakamta guók jájja táytek.

¹⁴ Të jü jámmut guoy águila mása bueerem mákhuak, ámey ä nínakë béchibo, mékka ánia see päriau bícha, ä annakepo, bakottau mékka, jum báij huásuktiria áma méeliapo simeta ä buänakeu jípunakë béchibo.

¹⁵ Jü bakot éntok, ä tempo huämi, jámutta sáu báam bathueta bénasi guötiak, bathueta ä núk sim íaaka.

¹⁶ Të jü buía jámutta aniak, bueítuk jü buía áu étapok. Huanäi juka bathueta yún báata huéiamta huüuktiak, juka báata dragóna tempo bétana yeu sikamta.

¹⁷ Huanäi jü dragón tüisi jámuttau kujteaka öomtek. Huanäi am béj-reka siika, jume huate gentem jámuttat yeu sákalammechi, ámemak nássuaseka, jume Diosta nésau joame, entok jíba Cristota lütüriata jípureka ä nokame.

13

Jume guoy animaalim máusi mamachi

¹ See bahue mayoatne kíktek. Huanäine senu animal máusi machik guoy búsanim kóbakamta éntok guoj mamnim ahuakamta bitchak, bahuero jikau huémta. Bem ahuammet éntok, guoj mamni diadeenam; bem kóbammet éntok, téhuam jiojterim Diosta béj-reka juénasi jíame.

² Jü animal máusi maachi ín bíchakäu éntok, yóokota bénaakay. Ä guókim éntok, osota guókim bénaakay. Ä teni éntok, leónta teni bénaakay. Jü dragón éntok ä úttiärahua ä mákkak, entok jü banko yäurata kutkutti ä nésaunakëhui.

³ Huépul ä kóbahua muk máchisi kökosi yáata bénakne bitchak, të jü muk máchisi kökosi ä yáaripo éntok, türiaka yorelata. Huanäi síme jü yóremra át guómtek. Huanärim jü animal máusi machita sáú kat táytek.

⁴ Huanärim ä úttilek, juka dragónta, juka animal máusi machik yäurata ä mákakäu béchibo; entokim ä yosireka taahuak, juka animal máusi maachik, ínel jíakari:

—¿Jábesu iri animal máusi machita bénasi áu óuleme? Entok, ¿jábesu áamak nássua báreka éenake jáni?

⁵ Két tenta mákhuak, buéresi jita ä noknakë béchibo, Diosta béj-reka jájana ä jiaunakë béchibo. Entok yäurata mákhuak, cuarenta áma guoy metpo, jita ä yáanakë béchibo.

⁶ Ä tenta étapoka éntok, jájana jiau táytek, Diosta béj-reka. Entok ä téhuam bétana, ä tiöpo bétana, éntok huame téhuekapo aneme bétana két jájana jiaahuak.

⁷ Huanäi santom bej-reka nássuatuahuak, entok am kobatuahuak. Entok ket yäurata mákhuak, síme yöremra kaa náu anim béppa, entok pueblommechi, entok huame juebena täbui nokta nokammechi, entok naciónimmechi.

⁸ Huanäirim síme ä yöreka áu mújtek, jume imi buíapo jíápsame, jume bem téhuam jum Kabara, mukukamta libro yü jíapsinake me jiojtepo, kaa áma jiojteri jípureme, jauhuey ániata naatekápo naateka.

⁹ Jábe nákakame ä jikkaijnake:

¹⁰ Bueítuk jábe pereesota hueriateko, pereesotaka núk sákana; jábe ejparammea mä báahuame, ejparammea muknake. Tuttem jíápseka Cristotat éiya, eme Diosta pueblo, imi ayuk jü kutti jiapseka at boobit-huame.

¹¹ Chúkula éntokne ket täbui animal máusi machik bitchak, buíapo yeu jikau huémta. Guoyim ahuakay, kabarata ahuam bénnam, të dragónta bénasi nookay.

¹² Éntok síme yäurata huaka animal máusi machik bat huémta jípurey, áapörík bíchäpo. Huanäi síme ániat jóakammeu nookak, juka animal máusi machik bat huémta am úttíl sáhueka, juka kökosi yáahuakamta, türiaka yorekamta.

¹³ Éntok két buére señaalim johuay. Bueítuk táijta junne téhueka bétana buíau kom

huéetuay, yóremraata bíchäpo.

¹⁴ Entok am bäi táttähuay, jume buíapo jóakame, jume señaalim ä jotuaïhuayi, animal máusi machita bíchäpo. Am sáuhuek, jume buíapo jóakame, animal máusi machita bénak am yáa ñaka, hua ejparammey kökosi yáahuakame, entok júchi jiápsakame.

¹⁵ Huanäi jü animal máusi maachi chúkula huéeme úttiärata mákhuak, juka animal máusi machik bat huémta bénak yáari, ä jíabitetuanakë béchïbo, bueïtuk juka alë bénak yáarita noknakë béchïbo, éntok am súatebonakë béchïbo, sïmem jume kaa ä úttilekame.

¹⁶ Huanäi sïmem jume il-lichimmet éntok yoiyöhuemmet, rikommet éntok poloobemmet, búttiataka tekipanuummet éntok súmataka tekipanuummet, markata ámet yéchatebok, mam bátatana ö chë kóba méjêku.

¹⁷ Huanäi kaabe ára jita jínny, entok kara jita nenkay, ál-la hua markata jípureme jíbba, ö jü animal máusi machik téhuam, ö jume ä téhuaa número.

¹⁸ Ímï koba suahuari aika; jü át jüniamé ä näikianake, juka animal máusi machita número, bueïtuk yorem número. Jü ä número éntok, búsan ciento áma sesenta y seis.

14

Jume ciento cuarenta áma naiki mil buikame

¹ Kabaratane bitchak, káhui Siónta béppa huéekamta, áapörimak éntok, ciento cuarenta

áma naiki miilimtaka. Ä téhuam entok ä Áchayhua téhuam, bem kóba méjëriammet jiojteritam jípurey.

² Huanäine senu jáhuita téhueka bétana jíkkajak, yún báam kusisi jáá bénasi, éntok yúkuta buéresi omtë bénasi jáamta. Jü jáhui ín jíkkajáihui éntok, arpariom bem arpan ponä bénasi jíkkajituy.

³ Huanärim senu buiiki bemelam buiikay, buére yörisi machi banko yäurata bíchápo, entok jume naikika jáápsaka áma aneme entok jume yoiyöturim bíchápo. Huanäi kaabe ára am tátäyay, jume buiikim, ál-la jume ciento cuarenta áma naiki miilim, ími buíapo jáápsame násuk jínëurime jíbba.

⁴ Ímëi béja jume jáamuchimmak kaa emo náyotekame, bueítukim jahuey jünem kaa jubek. Ímëi ámëria, jume Kabarata guojaaseme ják júne ä hueramápo. Ímëi yöremraata násuk jínëurime, kësam ofrendata Diostau buíjhuäpo bénasi, entok Kabaratau bícha.

⁵ Bem tempo éntok, kaita ára nókíchiria téihuak, bueítuk katim chicha maachim, Dios buére yörisi machi banko yäurata bíchápo.

Jü báij ángelesim nooki

⁶ Täbui ángeltane bitchak, téhueka násuk nëkamta, tü nokta jíbapo béchíbo jáápsamta jípuremta, ä nok báreka jume buíapo jóakammehui, síme naciónimmehui, familiammehui, tattábui nókta nokammehui, éntok pueblommehui.

⁷ Tüisi úttia ínel jiaahuay:

—¡Diostem májhueka jikau ä chátchaaka ä yöre! Bueituk yuumak jü hora, ä yäura ä bíttebonakëhui. Éntokem ä úttile, juka téhuekata, entok buíata, juka bahueta, entok jume bäam yeu pótame yáalamta.

⁸ Tábui ángel áa sáu siika, ínel jíaka:

—¡Béja huétchek! ¡Béja huétchek, jü buére jóara Babilonia, bueituk jü vino kaa emo jubeka náu totöhuame, síme jume naciónim ä jítualä béchïbo!

⁹ Jü ángel bájiku huéeme éntok áme sáu siika, tüisi kusisi jíaka:

—Jábe júne juka animal máusi maachik, entok juka alë bénak yáari, úttilekame entok ä markata ä kóba méjëku, ö ä mámpo mabetakame,

¹⁰ áapo ket ä jïnake, juka Diosta ómtirä vino tüisi máusi machisi jiokot anhuamta. İri Diosta copa ómtiriapo yeu töri, kaitamak kütiataka. Huanäi jiokot machisi yána, tájiyi entok azufreyi, santo ángelesim entok Kabarata bíchäpo.

¹¹ Jü jiokot bem anëu buiichia éntok, jíba yü huásu-huásuktiapo jikau huéiye. Entokim kaa jimyoore, taahuapo entok tukaapo junne, jume animal máusi machita entok juka alë bénak yáarita úttileme, entok jábe junne juka ä téhuam marka mabetakame.

¹² ¡Ímï bíttunake, jü Diosta pueblo yánti bem jíapsinakëhui, huame Diosta nésauri joame, entok Jesústa kaa koptíame!

¹³ Senu jáhuitane jikkajak, téhueka bétana inou ínel jáamta:

—Jiojtëe: “Úttesim al-leenake, ímï naateka, jume kókkolam, Señortat éaka kókkokame.” Jeehui, ti jiaahua jü Espíritu Santo, bem tékil bétanam jimyorenake, bueituk jü bem yáakäu áme bétana nokaka taahua.

Jü buíapo jíchupahuame

¹⁴ Ámanne bitchak, huanäine senu namu tósálita bitchak. Namuta béppa éntok, senuk kátekamta, Yoremta Üusi bénnak. Ä kóbat éntok senu corooná oropo yáarik jípurey ä mámpo éntok osa buahuim.

¹⁵ Huanäi tíöpo bétana täbui ángel áma yeu siika, tüisi kusisi chayeka, hua namuta béppa kátekamtahui:

—¡Osamë áman etpo kibacha! ¡Huanärë jíchupata toboktia, bueituk jü hora béja yuumak, jíchupä béchïbo! Bueituk jü eechi béja chúpila.

¹⁶ Huanäi jü namuta béppa kátekame ä osam echíu kibachak. Huanäi júka buíapo etta tóboktiak.

¹⁷ Senu ángel tíöpo téhuekapo kátekamta bétana yeu siika, ket senu osa buahuim jípureka.

¹⁸ Huanäi altarpó täbui ángel yeu siika, táijta béppa úttiärata jípureka. Huanäi tüisi kusisi át cháchayek, hua osa buahuim jípuremtachi, ínel jíaka:

—¡Em osa buahuimë áman kibacha!
¡Huanärë paraj takam náu lópola buíapo

chäkame chúkτια, bueituk jume paraj takam béja buássi!

¹⁹ Jü ángel éntok ä osam buíata béppa búitiriak. Huanäi am chúkτιαk, jume páraj taakam, jume páraj eechim buíapo ayukame. Huanäi jume páraj takam canoa bueürupo am töaka am chirijtiak, jum Diosta omtirapo.

²⁰ Jume páraj takam éntok, buére jóära pákun chirijtiahuak. Huanäi am töhuakapo éntok, ójbo yeu siika. Baniata bénasi báij cien kilómetropochíbejtek, bueituk kábäi pereenammeu tájti yuumak.

15

Guoy búsan kökoam simeta chúpëpo huéénakeme

¹ Téhuekapone täbui señalta bitchak, buëuruk entok at guomtisi maachik: Guoy búsan ángelesim guoy búsan kökoam simeta chúpëpo äbo huéénakeme jípurëhui. Bueituk ímëyi chúpëy, jü Diosta omtëhui.

² Kétne ä bitchak, bahue vik-riota bännak, tájimak náu kütiarita, entok jume yölataka yeu sákalame, bahue vik-riota béppa jábuekame, Diosta arpam jípureka. Ímëi áma yölataka yeu sájjak, juka animal máusi machita béppa, entok alë bénak yáarita béppa, entok ä tepojtim béppa, entok ä téhua número béppa.

³ Huanäi Moisés Diosta bétuk jíápsame buikimim buiikay, entok Kabarata bétana buiikim, ínel jíaka:

Buéresi entok ujoyoori síme jita em yáalähui,
 Señor Dios,
 síme Útteata jípureme.

Lútulaimme, tepam huéchiasi maachi,
 entokim lütüría, jume em böom,
 empo síme ániat Rey.

⁴ ¿Jábesu kaa enchi máujnake, Señor,
 entok em téhuam úttılınake?

Bueıtuk empo jíba santo;
 huari béchıbo, síme naciónim, emou yáijnake,
 entokim enchi úttılınake,
 bueıtuk jú lütüría em yáaláu béja bıt-huak.

⁵ Chúkula íkai simsukne ä bıtchak, téhuekapo
 tíöpo tua Diosta tabernaculo étapohuakamta.

⁶ Tíöpo bétana éntok, guoy búsan ángelesim
 áma yeu sájjak, jume guoy búsan kökoam bem
 mámpo jípureka, lino totósalim bebelojkom
 súpeka, entok táupo huásala cíntom oropo
 yáarım jípureka.

⁷ Huanäi huépülaka jume naiki jíápsaka áma
 aneme jume guoy búsan ángelesim guoy búsan
 copam oropo yáarım am mákkak, Diosta
 ómtiriay tátapunım, hua jíba yü
 huásu-huásuktiapo jíápsame.

⁸ Jú tíöpo éntok buııchiay tápunak, Diosta
 lóoria entok ä úttiára áma ayukä béchıbo.
 Huanäi kaabe ára áman kibakey, jum tíöpopo,
 jume guoy búsan ángelesim jume guoy búsan
 kökoam bem mámpo jípuräu am lütiau tájti.

16

Jume copam Diosta omtäu jípureme

¹ Senu jíahuiata tüisi kusikne jikkajak, tiöpo bétana jume guoy búsan ángelesimneu ínel jiamta:

—Ámanem sájaka buíata béppa am töa, jume guoy búsan coopam Diosta ómtiriay tatápunim.

² Jü ángel bat huéeme áman siika. Huanäi ä copapo ayukamta buíata béppa töak. Huanäi animal máusi machi markata jípuremmet entok juka alë bénak yáarita úttilemmet sähua juënaka entok úttesi chücha jubaka ámet yeu siika, jume yorememmechi.

³ Jü ángel guoyiku huéeme ä copapo ayukamta bahueta béppa töak. Jü bahue bäa éntok yorem mukilata ójbo bénasi áu yáuhuak. Huanäi síme bahuepo jíápsaka aneme kókkok.

⁴ Jü ángel bájiku huéeme bathuemmet entok ják báam yeu pótäpo juka ä copapo ayukamta áme béppa töak. Huanärim ójbosi emo yáuhuak, jume báam.

⁵ Huanäine juka ángelta báammeu bíttuata jikkajak, ínel jiamta:

—Empo huépülsi lütüriata jíba ára joame, Señor, Empo jíápsame éntok jíápsaïhui, jü Santo, bueítukë ínëli bétte nokta ámet chüppak.

⁶ Bueítuk bempo em gentepom joome entok profetam ójbo guötiak; én éntok empo ójbota am jítuak. Akim ä mabetpo yúmala.

⁷ Kétne senuk jikkajak altarta kátekä bétana, ínel jiamta:

—Lútüriapo Señor Dios, simeta ára joame, empo lútüriapo entok kuttílasi em noki ámet chúppak.

⁸ Jü ángel naikiku huéeme ä copapo ayukamta täata béppa töak. Tää éntok úttiäraata mákhuak, ä tájiy yóremraata am táanakë béchïbo.

⁹ Huanäi simem úttesi jìokot machisi tájaka taahuak. Tërim kaa Diostau emo jíapsi kuaktiak, entokim kaa ä úttilek, ál-lam jájjana áa bétana nookak, áapo úttiärata jípureme, íkai chibuk jekamta béchïbo.

¹⁰ Jü ángel mamniku huéeme ä copapo ayukamta jü animal máusi machita ä yeyesä banko béppa ä töak. Huanäi nésahueka reytaka ä kátekäpo kaa machika taahuak. Huanärim kökosi ä ínnëaka emo nín kékkey.

¹¹ Huanärim Dios téhuekapo jíapsamta bétana jájana nookak, juka kökosi bem ínnëau béchïbo entok bem sähuaam béchïbo. Júnentaka júnem kaa emo jíapsi kuaktiak Diosta bėj-reka bem jíapsä násuk junne.

¹² Jü ángel búsaniku huéeme ä copapo ayukamta buére bathue Éufratesta béppa töak. Jü ä baa éntok huaakek, böota ayunakë béchïbo, reyim täata yeu huë bétana kateme áma huám am kannakë béchïbo.

¹³ Huanäine jü dragónta tem bétana entok jü animal máusi machita tem bétana entok jü profeeta ára nókichi tem bétana baij espíritu chicha machim bátächim bénomne yeu kateme bitchak.

14 Bueituk lemooniom espíritumme. Señalimim johua, entokim reyim síme ániat anemmehuim kaate, áma náu am tóij báreka jum nássuahuäpo hua Diosta símeta ára joä buére táapo.

15 “¡Áachem suuhua! Ínapone lak-ronta bénasi äbo huéiye. Túisi yúmalasi al-lehuamta jipunake jü kaa kócheka jiápsame entok ä sánkohua suayame. Bueituk ä sánkohua kaa suayame éntok, tiusi kaa sánkoka hueramnake.”

16 Huanäi áma náu am tójjak, jume reyim, hebreo nokpo Armagedón ti téhuaakapo.

17 Jü ángel guoy búsaniku huéeme ä copapo ayukamta jekapo ä guötiak. Huanäi senu buére jíahui áma yeu siika, áman tiöpo téhuekapo kátekä bétana, jum buére banko yáurata bétana, ínel jíaka:

—¡Béja chúpila!

18 Huanäi béroktiriam ayu táytek, entok jíahuim entok yúku omtiriam; entok buía túisi áu yoyoak. Yoremta ímí buíata béppa jiápsay naateka, jauhuey junne kaa ínëli úttia áu yoyoolatukay, jü buíya.

19 Huanäi jü buére jóära báisi näikim huétchek, entok jume huate buére jóära ániat ayukame huáttek. Huanäi Dios buére jóära Babiloniatau huáhuaatek, ómtira vinota ä jítua báreka, bueituk áapo áu ä bíttuak ä omtépo.

20 Huanäi síme jume buía káhuim bahue násuk jokame, entok jume júya káhuim, ámam kaitatuk.

²¹ Huanäi téhueka bétana yóremrata béppa téjam tüisi buereka kóm huáttek, cuarenta kilota béppa bétteka. Huanäi jü yóremra Diosta bétana jájana nookak, ïri kaa tühua téjam bétana ámeu sikamta béchïbo, bueitukim úttesi jiokot yáahuak.

17

Jü jámut yún yorememmak jiápsame jiokot noki át chúpahuame

¹ Huanäi yepsak huépülaka, jum guoy búsan ángelesimpo huéeme, jume guoy búsan copam jípureïhui. Huanäi ínomak nookak, ínel inou jíaka:

—Ábe huéiye; huanäine enchi ä bíttuanake jáchin jiokot machisi áu ä huéenakëhui, jü jámut yún yorememmak jíapsilamtahui, yun báam béppa kátekame.

² Huärimakim totösula, jume reyim ímï ániat jíápsame; jume ímï buíapo jóakame éntok, jü ä kaa tíura vinoyim naakosula.

³ Huanäi Espíritupo ánia see päriau bíchaa nee núk siika. Huanäine huépül jámutta bitchak, animal kútko síkirikut béppa kátekamta, yún téhuam Diosta béj-reka juénasi jíame át jïojtetaka, guoy búsaním kóbakamta entok guoj mamnim ahuakamta.

⁴ Jü jámut éntok kútkosi síkirim entok síkili azuulik sánkokay, entok oroyi entok téta ujyorimmeyi entok perlammeyi tülisi áu yáalatukay. Ä mámpo éntok oro copata

jípurey; jita kaa bibit máchik entok jábetamak júne ä boböyëu jaiti máchiray tápuniakay.

⁵ Ä kóba méjëriat éntok, senu téhuam kara ámet júneetume jïojtetukay: “Jü buére Babilonia, jü jáamuchim kaa titihuëram áiyë, entok sime juka ímï buíapo jaiti machik johuamta kétchi.”

⁶ Huanäine jünëiak juka jámutta naa múkilatukaihui santom ójbuayi entok jume Jesústa téhuam súaleka kókkokame ójbuayi. Ä bíchakane guómtek, entokne úttesi át guómtilataka taahuak.

⁷ Jü ángel éntok ínel inou jiaahua:

—¿Jatchiakasë át guómtila? Ínapo enchi téjhuaanake, juka jámutta bétana esotaka kaa jüneriahuamta, entok jü animal máusi machik ä huéria bétana, jü guoy búsaním kóbakame entok guoj mamnim ahuakame.

⁸ Jü animal máusi machi em bíchakähui bannaataka jíápsay; én éntok kaa jíápsa. Të én éntok, mékka kóm guójöria bétana jikau jámu báare. Jikau jámusuk, jíbapo béchïbo áu tárúnau bíchaa huéenake. Jume buíapo jíápsame ániata naatekápo bem téhuam kaa jum libro yü jíapsihuäpo jïojterime guómtinakemme, animal máusi machita bíchaka, hua bannaataka jíápsaihui; én éntok kaa jíápsa, entok júchi jíapsinake.

⁹ 'Íri jü kóba suahuata jípuremta béchïbo: Jume guoy búsan kóbam guoy búsan káhuimme; huámechi béppa káttek, jü jámmut.

¹⁰ Entokim guoy búsan reyim. Mamnikam béja huáttila; huépülaka én nésahue; senu éntok ketune kee yepsa; të yepsak éntok kaa bínhua ímĩ annake.

¹¹ Jü animal máusi machi bannaataka jiápsaihui, én éntok béja kaa jiápsa. İri jü rey guoj naikiku huéeme, entok kětchi jü guoy búsanim násuk näikiari; entok áu ä tärunakeu bíchaa huéiye.

¹² 'Jume guoj mamni ahuam em bíchakähui, guoj mamni reyimme. Ketunem kee ä mabeta, reytaka bem nésaunakepo. Të senu horapom yäurata mabetnake, reyim bénasi, jü animal máusi machitamaki.

¹³ Ímëi nanancha éiya, entokim bem úttiärata entok bem yäura juka animal máusi machita ä máknake.

¹⁴ Kabaratamakim náassuanake; jü Kabara éntok am kobanake, bueituk Áapo sime reyim béppa Rey, entok sime nésahueme béppa nésahue. Jume Áamak aneme éntok, Diosta bétana núnurim entok yeu púarim entok jume át jiápseka kaa ä koptiame.

¹⁵ Jü ángel kət ínel inou jiaahua:

—Jume bää bürum jámut yún yorememmak jiápsilamta kátekäpo em bíchakähui, pueblomme; juebena gentemme, täbui nókta nokame, entok naciónimme.

¹⁶ Jü animal máusi maachi entok jume guoj mamni ahuam animal máusi machitat em bíchakäu, ímëi juka jámut kaa tihuëraata kaa bíbit péenake, entokim áapola sipasola kaa

súpekamta tóijnake, entokim ä takahua huakaj buänake, entokim táijpo ä táanake.

¹⁷ Bueituk Dios bem jiápsipo ä yétchak, ä éäu am yáanakë béchïbo: nánancha éaka bem yäura animal máusi machitam ä máknake, Diosta noki chúpëu tájti.

¹⁸ Jü jámut em bíchakäu éntok, jü buére jóara ímï ániat reyim béppa nésahueme.

18

Jü Babilonia huéhekame

¹ Íkai simsuk éntokne senu ángelta téhueka bétana kóm huémta bitchak, yäura úttiäraata jípurementa. Jü buía éntok ä machiriahuk ä looriayi.

² Huanäi úttia kusisi cháchayek, ínel jíaka:
—¡Béja huétchek! ¡Béja huétchek, jü buére Babilonia! Lemooniom éntok áma jóatela, entok síme espíritu jaiti mamachika áma éusula, entok síme huikit jaiti mamachim entok kaa bíbit máchikam áma tosatela.

³ Bueituk síme naciónim ái naakok, jü úttesi kaa ä tiura vinoyi. Jume reyim ániat jiápsame éntok áamak totösuk. Jume ímï ániat jita nenenkame éntok áma ríkotuk, jü jita yún ujyorik áma ayukamtayi.

⁴ Huanäine senu jáhuita jíkkajak, téhueka bétana ínel jiamta:

—Ámem yeu kaate, eme ín pueblo, juka kaa tühuata bem joähui kaa enchim ámemak ä jonákë béchïbo, entok juka chibu jékata ámeu ayunakemta kaa enchimet huéenkë béchïbo.

⁵ Bueituk jü kaa tühua bem joäu téhuekau tájti yúmala; Dios éntok síme bem kaa tühuaheu huahuaatek.

⁶ Akem ä mákka, áapörík enchim ä mákaka bénasi, entok guosa nat béppem ä béjtua, jum copapo. Juka jijihuaanta huatem béchibo ä yáakáhuem ä yáaria, guosa áa béppa chë úttiakamta.

⁷ Ahuä buérialékä béchibo, entok tüisi al-leesuka ä jiápsakä béchibo, chë jünem kökosi ä éetua éntokem ä buantua; bueituk ä jiápsipo ínel jiaahua: “Ínapone reinata bénasi káttek, entokne kaa jókoptula, entokne kaibu buanhuamta bínnake.”

⁸ Huarí béchibo senu táapo síme chibuka át jeknake: kókkohuame, buanhuame, entok tébaa. Entok tájijy táana, bueituk buére úttiak jü Dios, jü Señor juka nokta béttek át chúpame.

⁹ Jume reyim ániat aneme áamak totösulame entok al-leaka áamak jíapsilame buannakemme; entokim jiápsipo kökosi ä sirok-rianake, juka buichiata bíchaka ä táahuayo.

¹⁰ Mékka jábueka jiokot ä johuay májhuekam ínel jiaunake:

—¡Ay, ay! ¡Empo buére jóära Babilonia, jü buére jóära tüisi úttiakame! ¡Bueituk senu horapo Diosta noki béttesi emót chúppuk!

¹¹ Jume ániat jita nénkilerom éntok buaana, entokim jíapsi kökosi ä sirok-ria, bueituk béja kaabe juka bem nénenkäu jínnu:

¹² oro áusülipo, platapo, téta ujyori, perlampo yáata, sánko lino finopo yáata, síkirika, sedapo

yáata, kútkoka, sime jita kúta túlisi jubata, jita marfilpo yáata, jita kúta yeu púaripo yáata, jita cobre yáata, sisiguok yáata, entok mármolpo yáata,

¹³ entok canelata entok buähumta kíasi jubak jojoame, inciensota, mirrata, olibanota, vinota, aceiteta, harina chë türita, tirijkom, animaalim jita pupüateme, kabaram, kábäim, carrom, entok súmataka tekipanuame, bueituk ímëi yöremraata jíapsim.

¹⁴ Huanärim jü buére jóäratau ínel jiaunake:

—¡Béjë kaa am jípure jume taka kiuhuam, tepa em türëhui! ¡Jíba béchibë ä tärük, juka ujyorisi em jípusukähui, entok em rikoata!

¹⁵ Jume íkái tekipanuame, entokim rikotuk jü buére jóärata huämi, mékkam jäbueka tahuanake, májhueka jiokot ä johuayo. Buanakam ä sirok-rianake,

¹⁶ ínel jíaka:

—¡Ay, ay jü buére jóärata béchibo! ¡Áapo lino finota entok kútkok entok síkirim súpekay, oroyi, téta ujyorimmey entok pérlammeyi!

¹⁷ ¡Bueituk senu horapo tejalhuak, jü yún jita rikora ä jípureihui!

Jume barcopo huéhueriame nésahueme entok sime jume barcompo kakateme, entok sime jume marinerom bahuero tekipanuaka emo aniamé mékkam jäbueka taahuak.

¹⁸ Ä béetëu buichiata bíchakam cháchayek, ínel jíaka:

—¿Jíta buére jóärasu i buére jóärata bénaakay?

19 Huanärim bem kóbam béppam emo buíatuak, chayeka, buanaka entok jiokot jíaka:

—¡Ay, ay jü buére jóärata béchibo! Yún jita ä jípureïbeyim rikotuk, síme jume bahuero barcom jípureme. ¡Bueïtuk senu chúbalaposu tejalhuak!

20 '¡Empo téhueka al-leäe, jü buére jóärata bétana! ¡Éntokem al-leiya, eme Diosta yoremraapo joome, entok apóstolim entok profetam! ¡Bueïtuk Dios jiokot nokta át chúpaka ä yäura bíttuak, enchim béchibo!

21 Huanäi senu ángel úttiakame huépul tétata nüka, buére téta morinota bénnak. Huanäi bahuéu kóm ä jímak, ínel jíaka:

—¡Téta úttiaka kóm jímmaahuaka bénasi kóm tatabna, jü Babilonia, jü buére jóära! Huanäi jauhuey junne kaa téuna.

22 Jauhuey junne em böommet béja kaa jíkkajjtunake, arpa ponhuame, entok baka kúsia, entok trompeeta. Entok jita tékil mámpo johuame junne kaa emót téuna; morino jáhui junne kaa emót jíkkajjtunake.

23 Jauhuey junne béja kaa emót machirianake, jü lámparata machiria, entok emo jubhuame pajko jáhui kaa emót jíkkajjtuna. Bueïtuk jume em jita nenkileerom ímí ániat úttiatam jípurey, éntoke em móriay síme naciónim, bätattäusuk.

24 Bueïtuk jümü buére jóärapo ójbo áma téihuak, profetam entok Diosta yoremraapo joomem entok síme jume ímí ániat súahuakame ójbo.

19

Jü téhuekapo Diosta úttihuame

¹ Íkái simsuko senu jáhuitane jikkajak, tüisi kuusik téhueka bétana, juebenam yun náu ané bénasi, ínel jáamta:

¡Aleluya! Jínëuria, entok yörihuame,
entok lóoria, entok úttiära,
ítom Señor Dios am áttiak.

² Bueituk áapo lútulaisi entok lütüriapo áman ä yäura bíttebok.

Áapo jü jámut buére kaa tihuemtat nokta
béttek át chúppak,

bueituk ä kaa tiuray ániata nasontek.

Entok jume Diosta nésau joame áma
súahuakame ä bejtutuak apöríkuchi.

³ Juchim ínel jiaahua:

—¡Aleluya! Ä buichia éntok jíba
huásu-huásuktiapo jikau huéiye.

⁴ Jume veinte áma naiki yoiyöturim entok
jume naiki jiápsaka áma aneme tónommia
jápteka buíau kóm chätuk. Huanärim Diosta
úttilek, juka yörisi machi buére banko yäurapo
kátekamta. Huanärim ínel jiaahuay:

—¡Júnentunake! ¡Aleluya!

⁵ Huanäi jü buére yörisi machi banko
yäurapo senu jáhui yeu siika, ínel jíaka:
Ítom Diostem úttile, síme eme ä nésauri joame,
entok ä yöreme, junéli jume chë kaa ériahuame
entok jume ériahuame junne.

Jü Kabarata jubë pajkopo kuptey jibuähuame

⁶ Huanäine jáhuita jákkajak, juebenam náu anë bénasi, bää bürum jáhui bénasi éntok buére yúku omtiriam jáhui bénasi, ínel jáamta: ¡Aleluya! Bueituk jü Señor itom Dios sîmeta ára joame reytaka nésahue.

⁷ Ujyorisite éenake, entokte al-leenake, entokte lóoriata ä máknake, bueituk Kabarata jubëu pajko béja yuumak. Ä kunaseme éntok tülisi áu yáaka sánkotela.

⁸ Áapo éntok lino finoyi tülisi machiyi entok belojkoy súpetuahuak.

Bueituk jü lino fino, Diosta pueblopo joomem Diosta bíchäpo tülisi huéchiasi anhuame.

⁹ Jü ángel éntok ínel inou jiaahua:

—Akë ä jïojte: “Al-leehuame áme béchïbotunake, jume Kabarata jubë pajkopo jïbuä iaahuaka núnurim.”

Huanäi ínel inou jiaahua:

—Ímëi Diosta nokim lütüriamme.

¹⁰ Huanäine ángelta guókpo áu tónommia kíktek, ä yöri báreka. Áapo éntok ínel inou jiaahua:

—Ëe, ¡katë júkai johua! Bueituk ínapo Diosta nésauri johua, emo bénasi, entok Cristota huám émomak aanim, entok Jesústa bétana nok lütüria kaa koptíame bénasi. Diostë yöre.

Bueituk jü Jesústa nok lütüria profeciata espíritu.

Jü kábäi tósaliit jikat yessimeme

¹¹ Huanäine téhuekata étaporikne bitchak; kábäi tósali éntok áma yeu machiak. Jü át yessimeme éntok, jü huitti Diostat jíapseka tua

lütüriapo ájãria ti téhuak, bueituk lütüriapo huám néshue, entok nássua.

12 Ä pusim éntok tájita béetë bénaakay. Ä kóbat éntok yún diadeemam huériay. Entok senu téhuam át jïojterim jípurey, kaabeta éntok täyhui, áapo jíbba.

13 Ä súpem éntok símekut ójbokay; ä téhuam éntok, “Diosta Nookim”, tim téhuaakay.

14 Jume téhuekapo sontarom éntok, lino fino totósalik entok túlisi machik sánkoka áa sáukim kaatey, kábãi totósalimmechi.

15 Ä tem bétana éntok ejpara buahui síbulaika yeu huéiye, jume naciónim, ay kókosi yáa báreka. Áapo éntok kutkutti jíbebia sisiguokiyi ámet nésaunake. Huanäi Dios símeta ára joame tüisi omteka ámet cheptinake, jum vinota jojohuäpo.

16 Ä sánkot entok ä máchammet ímëi téhuam át jïojteri: “Símem reyimmeu Rey síme néshueme áapo sauhue.”

17 Huanäine senu ángelta täat huékamta bitchak. Huanäi tüisi kusisi cháchayek, síme huikichim téhueka násuk nenëyemmehui, ínel jíaka:

—¡Äbem kaate, éntokem Diosta buére kuptey jïbuähuäpo náu rúkte,

18 bueituk reyim entok jume sontaro yö yáarim huaakas enchim buänakë béchïbo, entok yoreme úttiakame huaakas, kábãim entok ámet josakame huaakas, entok símem súnataka entok kaa súnataka aneme huaakas,

jume chë kaa ériahuame entok jume ériahuame huaakas!

¹⁹ Huanäine animal máusi machita bitchak, entok reyim ániat aneme entok bem sontarom, emo náu tóij-lame jü kábäit yessimemtamak nássua báreka, entok ä sontarommaki.

²⁰ Huanäi jü animal máusi machi peresotehuak, áapörimak éntok jü profeeta ára nókichi ä bíchäpo señaalim yáakame. Jümëi am bätäulatukay, jume animal máusi machita marka mañetakame entok alë bënasi yáata úttilekame. Ímëi guoyika jíápsakam táji baubäata bénaku azuufrey béetëpom kóm guötiahuak.

²¹ Jume huate éntok súahuak, jume ejparam kábäit yessimemta tempo yeu huémtayi. Huanäi síme jume huikichim huakajta ára buäyeme am buäka jóbuak.

20

Jume mil huásuktiriam

¹ Senu ángeltane bitchak, téhueka bétana kóm huémta, mékka kóm guójöria llavem huériaka, cadeena bueürum éntok mámpo jípureka.

² Huanäi juka dragóna buíssek, jü bakot binhua jakhuey huéeme, jüri beja jü diablo entok Satanás. Huanäi mil huásuktiapo ä súmmak.

³ Huanäi mékka kóm guójöku kömä jímmak. Huanäi ä páttiak, entok ä sello áa béppa yétchak, jume naciónim béja kaa ä bätatäunakë béchibo, mil huásuktiriam

yumäu tájti. Íkái simsuk éntok júchi chúbala búttiana.

⁴ Huanäine banko yäuram bitchak. Huanärim éntok ámet jotek, jume yäurata mabet-lame Diosta noki jábetat chúpanakeme. Huanäine két am bitchak, jume kóba chúktiahuakame Jesústa lútüria bem nokakä béchïbo entok Diosta noki béchïbo. Ímëi animal máusi machita entok jume alé bénak yáarik kaa úttilekame, entok juka markata bem kóba méjëriat entok bem mámpo júne kaa mabetak. Huanärim jábiteka jiápsak, entokim Cristotamak mil huásuktiapo néshuek.

⁵ Të jume huate kókkolame katim júchi jábitek, mil huásuktiriam yúmak jübua. Ìri jü kësampo jábitehuame.

⁶ ¡Tüisim al-leenake, jume kësampo jábitehuäpo jábitekame! Jü mukia guoyikun huéeme káita ámeu yáanake, ál-lam sacerdotemtunake, Diosta entok Cristota béchïbo, entokim áamak nésaunake mil huásuktiapo.

⁷ Mil huásuktiriam yúmake, Satanás búttiana, ä páttiatukäpo.

⁸ Huanäi yeu sika naiki kätana naciönim, sime ániat ayukame bätäunake, Gogta entok Magogta, náu am tóij báreka am nássuanakë béchïbo. Ímëi éntok bahue sëeta bénasi búrunake.

⁹ Huanärim sime ániat bétana ámam jikau náu yájjak. Diosta yoremem nau anëpo entok buére jóära Diosta nákëhuim kóntiak. Të Dios

téhueka bétana táijta kóm simtuak. Huanäi simem táiyak.

¹⁰ Huanäi jü diablo am báitahuakame baubäa azuufrey táji béetëpo kóm jímmaahuak, jum animal janti machita entok profeeta ára nókichita anëpo. Huanäi jü tüisi kökosi buanhuame kaa chúkteka ámeu ayutuana, taahuarit entok tukaarit naa búrujti jíba yü huásu-huásuktiapo.

Buére rey banco tósali yäura bít-huame

¹¹ Huanäine buére rey banco tósalik bitchak, entok juka áma kátekamta. Ä bíchäpo jü buíya entok jü téhueka yehuim ténnek. Huanäi jü bem annakepo ják júne kaa téihuak.

¹² Huanäine jume kókkolam bitchak, jume chë yörisi maachim entok kaa yörisi maachim, Diosta bíchäpo jäbuekame. Huanäi jume librom étapohuak, entok täbui librom këtchi; ímëi éntok jíapsihuame liibrom. Huanäi jume kókkolam yäura bíttuahuak, bueítuk juka jita bem yáakäu jum librompo jiojterita jiäpo ámani.

¹³ Huanäi jü bahue kókkolam ä jípurëu yeu am sákatuak. Jü muerte entok jü Hades kókkolam anëipo jume kókkolamim yeu sákatuak. Huanäi huehuëpulaka yäura bíttuahuak, síme jita bem yáakäpo ámani.

¹⁴ Huanäi jü muerte entok jü Hades baubäa tájihuum kóm guötiahuak; ìri kókkohuame jü guoyikun huéeme.

¹⁵ Sime jume bem téhuam kaa áma jïojteri jípureme jum jíapsihuame libropo, baubäa tájihuim kóm guötiahuak.

21

Téhueka bemela entok buía bemela

¹ Senu téhueka bemelatane bitchak, entok senu buía bemelata; bueituk jü téhueka bat huéeme entok buía bat huéeme lütekamme. Bahue júne béja kaitatuk.

² Entok ínapo Juan juka buére jóära Diosta yeu púari, Jerusalén bemelatane bitchak, Diosta téhueka bétana kóm huémta, kuna báaremta túlisi áu yáalata bénasi, ä jub báaremta béchïbo.

³ Huanäine téhueka bétana senu jáhuita tüisi kusisi jáamta jíkkajak:

—¡Dios én sime gentetamak jóuhuak!

Ámemak jíapsinake; bempo éntok ä pueblotunake. Dios éntok ámemaktunake, bem Diostaka.

⁴ Dios bem pusim sime ópua tútenake; entok kókkohuame kaitatunake, entok buanhuame junne. Kókosi éehuame junne, entok huántiriam junne, bueituk jü jita bát ayukaihui béja lütek.

⁵ Jü rey bankopo kátekame éntok ínel jiaahua:

—Ínapone sîmeta én bemelasi johua.

Huanäi ínel inou jiaahua:

—Akë ä jïojte, bueituk ï nokhuame tua lütüria entok lütula huëpo huéiye.

⁶ Huanäi ínel inou jiaahua:

—Béja yáasuhuak. Ínapone jü Alfa entok Omega, jü bát huéeme entok chúpëpo huéeme. Huaka bäimukemta, ínapone ä bää miknake, kaita béjtuahuaka, jume bääm yeu chépteme jíapsihuamta yore mákame.

⁷ Huä yöokame simeta íkái mabetnake. Ínapo éntok áu Diostunake; áapo éntok ín üussitunake.

⁸ Të jume nanahuiam, jume Diosta kaa súalëram, jume jaiti máchiraaku jíápsame, jume jábeta súalame, jume kaa emo jubeka náu jíápsame, jume móriata boojoriame, jume dios yorem yáarim yöreme, entok síme jume ára nókichim, jum baubää táijta béetëpo entok azuufrekäpom annake. Íri jü guoyikun huëpo kókkohuame.

Jü Jerusalén bemela

⁹ Huanäi senu ángel jume guoy búsanimmak näikiari, guoy búsan copam guoy búsan kaa tühua kókoammey chúkula hueenakemtay tápunim jípureme, inou siika. Huanäi ínomak nookak, ínel jíaka:

—Binë huéiye. Ínapone juka kunasemta enchi bíttuanake, jü Kabarata juubi.

¹⁰ Huanäi Espíritupo senu buére káhuui entok mejikachikun nee núk siika. Huanäi buére jóära Diosta yeu púari Jerusalénta nee bíttuak, téhueka Diosta tehueka bétana kóm huémta.

¹¹ Diosta lóoria jípurey; ä machiria éntok téta tüisi uyyorita bénaakay, téta jaspeta bénasi; cristalta bénasi naa machiakay.

12 Buére jóära Jerusalén chíkola éntok téta kóräita buëuruk mejikachik jípurey, doocem puertakamta. Puertampo éntok huëpul ángelesim jäbuekay, éntok téhuam puertammet jïojteritukay; ímëi jume dooce familiam Israelta üusim téhuam.

13 Täata yeu huë bétana, báij puertam; norte bétana, báij puertam; sur bétana, báij puertam; täata áman huéchë bétana, báij puertam.

14 Jü buére jóära téta kóräi éntok dooce tétam nahuakay. Ámet éntok áma jïojteritukay, jume dooce Kabarata apóstolim téhuam.

15 Jü ínomak nokame éntok ili bakata áy jujünaktehuamta oropo yáata jípurey, buére jóarata éntok ä puertam éntok ä téta kóräi jünakte báreka.

16 Jü buére jóära naa reekisi náikim tébiakay; ä tébia éntok ä buékaa ket nánälaitukay. Jü ángel éntok ä ili bakay ä jünaktek, juka buére jóarata: guoy mil áma guoy cien kilómetrotukay, ä tébia. Éntok jikau bíchaa éntok ä buekaa ket nánälaitukay.

17 Huanäi sep téta kóräita jünaktek. Sesenta y cinco méetrom jípurey; jü ángel yoremta áy jujünaktemtay ä jünaktek.

18 Jü kóräi éntok téta jaspepo yáaritukay; jü buére jóära éntok oro áusülitukay; vik-rio kálakosi bénasi bélojkoakay.

19 Jume buére jóarata kóräi nahuam éntok, síme uyjori tétammeyim tülisi yáaritukay. Jü nahua bát huéeme jaspetukay; jü guoyiku huéeme zafirotukay; jü bájiku huéeme

áгататukay; jü naikiku huéeme
esmerál-latukay;

²⁰ jü mamniku huéeme ónicetukay; jü
búsaniku huéeme cornaliinatukay; jü guoy
búsuniku huéeme crisólitotukay; jü guoj
naikiku huéeme beriilotukay; jü bátaniku
huéeme topaaciotukay; jü guoj mamniku
huéeme crisopra satukay; jü oncepto huéeme
jaciintotukay; jü doocepo huéeme
amatistatukay.

²¹ Jume dooce puertam éntok dooce
pérlamtukay; huépü puerta huépül pérlay
yáatukay. Jü buére jóära böo éntok oro
áusülitukay; bik-riota bénasi naa machiakay.

²² Kanne tiöpota áma bitchak, bueituk jü
Señor Dios síme úttiäraata jípureme, áapo
áma tiöpo, éntok jü Kabara kétchi.

²³ Täata éntok mechata ä machirianakēhui
kaa áu bëye, buére jóaratahui, bueituk Diosta
lóoria béchibo bíttu. Jü Kabara éntok ä
machiria.

²⁴ Jume naciónim jínëutunakeme ä
machiriapom naa kannake. Jume reyim ániat
aneme éntok bem yún jita jípurëu áu tóijnake,
ä yöreka.

²⁵ Ä puertam taahuapo jauhuey júne kaa
páttiatunake, bueituk jümü kaita
tukaaritunake.

²⁶ Huanäi jume naciónim lóoria éntok bem
yörihuäu áu huéeriana.

²⁷ Kaita jita chicha machi áma kibaknake, o
jaiti machik jojoame, éntok ára nókichiata
boojoriame junne; ál-la jume bem téhuam libro

jíapsihuamta Kabarata áttiampo jïojterim.

22

¹ Chúkula bathueta kaa chïcha machik nee bíttuak, bää ámey jíapsihuame, vik-riota bénasi bélojkom. Ímëi Diosta entok Kabarata banko rey hétuk hétanam yeu huéiyey,

² jü buére jóarata böo násuku. Ímëi náapo éntok, júya áma yötu, jíapsihuamta yore mákame, bathueta íatana entok huáytana. Huásuktiapo doocesi tatakay. Chíkti metpo tatakay. Jume buére júya sáhuam éntok, naciónim ámey jítto béchibotukay.

³ Huanäi hua juénasi éehuame áma kaitatunake. Diosta entok Kabarata banko rey áma annake; ä néshui joame éntok ä yörinake.

⁴ Entokim ä pújba bínnake. Ä téhuam éntokim bem kóba méjëriammet jípunake.

⁵ Jümü kaita tukaaritunake. Huanäi éntok lámpara machiria entok tää machiria kaa ámeu bïnake, bueítuk Dios Señor ä machiria am máknake. Entokim rey nésaupo yü huásu-huásuktiapo nésaunake.

Cristota yebijnakeu abe yuuma

⁶ Huanäi jü ángel ínel inou jiaahua:

—Ï nokhuame tua lütüria entok lütula huëpo huéiye. Jü Señor Dios, profeta espíritu áttiakame, ä ángel äbo bíttuak, ä nésauro joame juka läuti yeu huéenakemta am jüneria äaka.

⁷ —Empo, jläutine yebijnake!

¡Diosta tü éäu áamaktunake, jü ä ëriame íkái profeciáata nooki, ímí librompo!

⁸ Ínapo Juan íkäine jíkkajak, entokne ä bitchak. Chúkula éntokne ä jíkkaijsuka entok ä bítchuka, guókpone áu tónommia kíktek ä yöri báreka, jü ángel íkái nee bíttuakamtahui.

⁹ Të áapo ínel inou jiaahua:

—Èe, ¡júkärë kaa johua! Bueítuk ínapone Diosta nésaui johua, emo Bénasi, entok Cristotahuam émomak aanim, jume profetam, entok sime jume ímí libro jiojteta nok jíkkajaka ä joame. ¡Díostë yöre!

¹⁰ Két ínel inou jiaahua:

—Katë ä éeso, íkái nokta libro profeciápo huémta, bueítuk taahuari yúmaseka huéiye.

¹¹ Jü kaa lútula jíápsame éläpo kaa lútula jíápsinake; jü jaiti machik joame éläposu jíba jaiti machik jonake; jü lútula jíápsame éläpo jíba lútula jíápsinake; entok Diosta béchïbo huépülsi jíápsame jíba junëli jíápsinake.

¹² —Jehui, ¡ínapone läuti yebijnake, juka enchim kobari ínomak huériaka! Ímëine hueepulam nátepolá am máknake, juka bem kobakähui.

¹³ Ínapone Alfa entok Omega, jü ä naatëpo huéeme entok ä chúpëpo huéeme, jü bát huéeme entok ä lütëpo huéeme.

¹⁴ Yúmalasi al-lehuamta jípunake, jume bem sánkom báksiame. Lútüriatam jípunake, jü júya jíapsihumtahui entok buére jóära puertampo huám ámam kimu béchïbo.

¹⁵ Të jume chüum päkum tahuanake; alë bénasi jume móriäram, jume kaa emo jubeka nau jiápsame, jume yore súame, jume ídolom yöreme, entok síme juka ára nókichiata türeme entok ä joame.

¹⁶ —Ínapo Jesús ín ángeltane enchimneu bíttuak, íkái iglesiampo enchimneu ä nok íaaka. Ínapone jü naahua entok jü Davidtat yeu simlame, jü chóki mékka machisi machiriame kethuey yeu sisimeme.

¹⁷ Huanäi jü Espíritu Santo entok jü jubiari ínëlim jiaahua:

—¡Binë huéiye!

Jü íkái nok jíkkajakame két ínel jiaunake:

—¡Binë huéiye!

Jü bäi mukeme äbo huéenake. Jábe júne ínel éame éntok, báa jíapsihuamta yore mákame jínake, kaita béjtuaka.

¹⁸ Ínapo én íkái ámeu nooka, síme huame ímí libropo jiojteta jíkkajammehui: Bueítuk jábetaka junne ímí áa béppa áu ä rúktiakätek, Dios jume béttesi kökoam ímí libropo jiojteta áu bíttuanake.

¹⁹ Entok jábe junne nokta ímí libropo jiojtëpo huémta ä úhuaako, Dios ä áttia ä úhuaanake, jum libro jíapsihuamta huëpo, entok buére jóära santo näikiarita, entok jita ímí libropo jiojterita.

²⁰ Jü íkái nokame ínel jiaahua:

—Tua lütüría chúbalaposune äbo yebijinake.

Júnentunake. ¡Jeehui! ¡Äbe huéiye, Señor Jesús!

²¹ Jü itom Señor Jesucristota tühua
enchimmaktunake. Júnentunake.

Mayo

Mayo: Diosta nooki yorem nokpo New Testament

copyright © 2014 Wycliffe Bible Translators, Inc.

Language: Mayo

Contributor: Wycliffe Bible Translators, Inc.

All rights reserved.

2025-05-13

PDF generated using Haiola and XeLaTeX on 11 Jun 2026 from source
files dated 13 May 2025

84020f7b-8f34-5f65-803f-a2c6c92b92ea